

行  
水  
金  
鑑

九十九  
十五

ル 5  
1174  
10



門 儿 5  
1174  
卷 10



行水金鑑

卷第九十一

中憲大夫分巡淮揚等處地方兼理漕務海防河道鹽法屯田事務南提刑按察使司副使加七級傳澤洪錄

運河水

黑水西河唯雍州 浮于積石至于龍門西河會于渭

澗禹貢

龍門之河在冀州西積石山在金城西南河所經也  
沿河順流而北千里而東千里而南龍門山在河東  
之西界水北曰澗孔氏傳

河在雍州之東而謂之西河者龍門之河在冀州西  
界故王制曰自東河至於西河千里而近是河相對

而為東西也地理志云積石山在金城河關縣西南  
羌中龍門山在馮翊夏陽縣北毛詩傳曰汭水涯也  
鄭云汭之言內也蓋以內皆南面望水則北為汭也  
且涇水南入渭而名為渭汭知水北曰汭

孔氏疏漢河關縣在今陝西

西寧衛西南塞外夏陽今西安府之韓城縣也積石龍門見前

雍州西盡黑水東界西河貢道自積石乘河而下其  
東出於渭水凡有二河皆會西河

書古文訓

河自積石東北流至中國折而南至華陰又折而東  
至大伾又折而北至冀州帝都界於三河之間故王  
制曰自恒山至于南河千里而近自東河至于西河  
千里而近其曰東曰西曰南皆自冀州而言之也濟

河唯兗州此東河也蓋在冀州之東荆河唯豫州此  
南河也蓋在冀州之南黑水西河唯雍州此西河也  
蓋在冀州之西雖自冀州而言之有此三河其實一  
也冀州之西接於雍州以河為境雖冀州之西河然  
其實雍州之東境也黑水歷雍州梁州之西入於南  
海此二州皆以黑水為境漢孔氏曰西距黑水東據  
龍門之河孔氏所謂據乃跨而越之也冀州之與雍  
州分河之東西不應言據唐孔氏曰計雍之境被荒  
服之外東不越河而西踰黑水王子雍曰西據黑水  
東距西河所言得其實也徧簡孔氏皆云西距黑水  
東據河必是誤此說是也九州之末載通于帝都之

道皆以達於河爲至蓋帝都介於三河之間達于河則至於帝都矣此州達于帝都有二道浮于積石至于龍門西河者一道也自渭汭以達于河者又一道也

尚書全解

會言貢道之會非會貢也

禹貢集解

雍梁荆三州其貢道相因者臣論沔漢嘗及其詳矣荆之貢不徑浮江漢而兼用沱潛者隨其貢物所出之便或由正途或循枝派期便於事而已也邈漢之極無水可浮則陸行至洛以期達河故曰浮于江沱潛漢逾于洛至于南河也荆之貢道其先梁而書者顯詳如此而梁貢南道亦與之同蓋自岷江順下至

今之漢漢陽邈漢以北與荆之入貢正共一途故經既書之於荆而不再書於梁也梁之北境貢入之道去江則遠故必自今閬劍之北金洋興元之南取逕入潛以求達乎漢也然則不浮漢潛者凡漢水支流皆可名潛隨其逕便可達即達不容必待至漢乃浮也自今日利閬北上轉東而道乎金牛以及漢中卻爲夷徑而此時遠在秦前今金牛縣五丁之道未開則凡巴郡在北而遠江者其貢入正以浮潛爲便而非舍劍利不由也既浮潛達沔又可以求逾乎襄而展轉達斜以入於渭其逕道當然也襄今不名爲沔然漢上爲沔此襄既據漢水上流正與沔應雍之貢

入亦有兩道其北道自後世朔方西涼浮河者無所  
因於他州故特記其詳曰浮于積石至于龍門西河  
其南道自今陝西入河者與梁之北貢所謂浮于河  
者同道而可以會合積石之貢於河故又因梁州前  
文而特致其略止曰會于渭汭而已其義例與梁荆  
一律也

禹貢山川地理圖說

爾雅河西曰雍州注云自西河至黑水疏引李巡云  
兼得梁州之地周禮正西曰雍州疏云周之雍豫於  
禹貢兼梁州之地按梁併於雍說本漢志然雍州西  
北二邊世有戎翟之患自夏桀時畎夷入居邠岐之  
間成湯既興伐而攘之及殷室中衰諸夷皆叛至于

武丁征西戎鬼方三年乃克故其詩曰昔有成湯自  
彼氐羌莫敢不來享莫敢不來王言武丁能繼湯之  
烈也及武乙暴虐犬戎寇邊周古公踰梁山而避於  
岐下及太丁之時季歷伐燕京之戎戎人大敗周師  
文王爲西伯西有昆夷之患北有玁狁之難遂攘戎  
翟而戍之莫不賓服厲王無道戎狄寇掠乃入犬止  
殺秦仲之族宣王承厲王之後玁狁孔熾整居焦穫  
侵鎬及方至于涇陽雍州之域爲戎翟所侵陵如此  
則其疆場未必能悉如禹貢又禹貢梁州之山水無  
一入職方者故杜氏言梁州當夏殷之間爲蠻夷之  
國蓋即牧誓所稱庸蜀盧彭等是也雍之併梁亦虛

名耳今據周禮言之正東曰青州其南則有揚其北  
 則有幽而西則不然曰雍州以正西其西北西南兩  
 隅皆缺焉然則梁地為羈縻之國固不待言而雍之  
 西境如西傾積石豬野流沙三危黑水之區皆沒於  
 戎翟禹貢之舊疆不可復問矣爾雅曰雖州以河西  
 則華山以南不在界中可知其西北亦當虧損殷周  
 之雍實小於禹貢或因併梁之說而反以為大此耳  
 食之學未可與道古也 雍州為奧區神臯后稷始  
 封於郃一作駘又作釐公劉處豳太王徙岐文王作豐武王治  
 鎬及扈崇密須之封皆在焉春秋時可考者號文王弟所封曰西號  
 周召畢豐鄭初封咸林之地漢為鄭縣屬京兆今華州是秦芮梁崇密驪戎白狄

晉西境是凡十四國戰國時屬秦而魏趙亦兼得其地秦  
 并天下置內史上郡北地九原隴西雲中西南境唐榆林郡是漢以  
 其地之西偏置涼州領郡十漢志云改雍曰涼而三輔則領於司隸後  
 漢並因之魏分置秦州晉又分置雍州領郡國七治京北涼州領郡國八治武威  
 秦州領郡六治上郡唐為京畿之京兆府州雍華陰華馮翊同扶風岐  
 新平郿等郡關內道之汧陽隴安定涇彭原寧安化慶平涼  
原靈武靈五原鹽寧朔宥洛交廊中部坊延安延咸寧丹上郡  
綏銀川銀新秦麟朔方夏九原豐榆林勝安北大都護府分豐勝二州界置等  
 郡隴右道之天水秦隴西渭金城蘭會寧會安鄉河臨洮洮  
 和政岷寧塞廓西平鄯武威涼張掖甘酒泉肅晉昌瓜燉煌沙  
 伊吾伊交河西北庭庭州後為都護府安西都護府等郡按以上通典

所列伊吾交河北庭安西自古為戎狄不在禹貢九州之限又河湟之間吐谷渾故地未嘗為郡縣故不入雍域以今輿地言之陝西臨洮平涼慶陽延安鳳翔五府其西安府則唯商州洛南山陽鎮安商南鞏昌府則唯鳳縣兩當徽州成縣階州文縣為梁域餘皆屬雍又榆林衛寧夏衛寧夏中衛及靖遠岷州洮州三衛行都司所領甘州莊浪等諸衛所其在化外者南至西傾積石西踰三危北抵沙漠皆古雍州域也 夏殷之衰雍州西北境皆為戎翟所據及周室東遷舊都八百里之地悉棄以予秦秦染夷俗諸侯擯之不與中國會盟輶軒之使莫有過而問焉况三

危西裔之區乎故屈原天問曰黑水廟諱趾三危安在蓋自戰國時此地之山川已與崑崙弱水同其渺茫僅得之傳聞而無從目驗矣秦火之後載籍淪亡漢興治尚書者不能言黑水三危之所在武帝通西域玉門陽關之外使者往來數十輩不聞涉大川而西有可以當古之黑水者故班志張掖酒泉敦煌郡下並無其文司馬彪亦無可言至酈道元始云黑水出張掖雞山而其所謂南流至燉煌過三危入南海亦不過順經為義與他水歷敘所過之郡縣者詳略相去遠矣故杜佑云道元注水經銳意尋討亦不能知黑水所經之處唐初魏王泰撰括地志又云黑水出

伊吾縣北此與張掖雞山未知孰是然其所謂南流絕三危者竟亦不可復尋按伊吾縣唐伊州治也本伊吾盧地貞觀初內附乃置郡縣自甘州以至伊州凡一千五百餘里郵傳不絕宦游之士商旅之徒與夫出使西域者往來如織而不聞言燉煌之西有黑水焉此杜佑所以復有年代久遠或至堙涸之說也難者曰黑水行及萬里黃河之亞也何至於堙涸余曰湮涸之故嘗觀於黃河而知之矣夫下流壅塞則上流必決而徙道水之常也齊桓公時九河填闕下逮周定王五年不過四五十歲而全河南徙鄴東之故大河黎陽之宿胥故瀆漢世已不可得詳矣黑水

當亦如此蓋三危以南禹功不及易致壅塞下流既然則上流決而徙道從塞外行不復經燉煌界中此三危之西鹽澤之東所以終不見有黑水也難者又曰水即不至其枯瀆寧無遺跡乎曰凡黃河既徙之後其枯瀆風沙填塞未幾而化爲平陸况黑水經流沙之域風吹沙擁抑又甚焉遺迹無存固其所矣周定王時河徙史遷亦不能言賴有周譜載其事王橫始得據此以推知禹河本從西山下東北去彼黑水者不由中國入海又雍西久沒於戎翟新流故道夫孰爲紀之而孰爲傳之邪禹治黑水不若治河之詳河歷千六百餘年而亦不免於徙則黑水之改流較



速疑當在定王之前自屈原已不能知而况伏生輩乎自古文尚書家已不能知而况班固司馬彪酈道元魏王泰諸人乎至若樊綽程大昌金履祥李元陽等紛紛辨論如繫風捕景了無所得徒獻笑於後人而已西河東與冀分界自今榆林衛故勝州東北折而南且西經府谷神木又西南經葭州吳堡又南經綏德清澗延川延長又東南經宜川並屬延安府又南經韓城郃陽朝邑以至于華陰並屬西與豫接界河行凡一千七百餘里雍之南界自華陰太華山以西為華州渭南藍田鄠縣盩厔並屬西郿縣寶雞並屬鳳翔府皆以南山與梁分界又西為鳳縣有大散嶺又西為徽州

有鐵山木皮嶺又西為成縣有鷲峽羊頭峽龍門戍並屬鞏昌府又西為岷州衛又西為洮州衛有西傾山皆與梁分界處自西傾又西歷吐谷渾南至大積石自積石又西歷吐谷渾南党項白蘭之北至于黑水吐谷渾本遼東鮮卑種也東晉初徙居枹罕宋景平中其子孫有阿豺者升西疆山觀墊江源則其地南至西傾矣又數傳為夸呂始自號可汗治伏俟城在青海西十五里據有甘松之南洮水之西南極於白蘭其地東西三千里南北千餘里党項羌在古析支之地漢時燒當羌亦嘗居之白蘭者羌之別種也其地皆與吐谷渾接吐谷渾在河湟之間即先零燒當諸羌

故地積石在其西南南枕賜支河曲禹導河自此始  
則湟水之南積石之北西傾之西其為雍州之域無  
疑矣 雍之北界經無可見約略言之自今塞外東  
受降城之西與冀分界元和志云東受降城在勝州榆林縣東北八里又西四百里  
為中受降城元和志云南至麟州四百里又西四百餘里為西受降城  
元和志云在豐州西北八十里唐景龍二年張仁愿所築南直今榆林衛  
黃河經三城之南謂之北河河北有陰山為華夷大  
限侯應曰北邊塞至遼東外有陰山東西千餘里是  
也又西為高闕山戰國時趙築長城並陰山下至高  
闕為塞及秦始皇斥逐匈奴城河上為塞又使蒙恬  
度河取高闕陶山北假中築亭障以逐戎人是也其

地又有光祿塞雞鹿塞漢受降城皆雲中五原二郡  
境也又西為河西四郡之北鄙漢太初中收匈奴休  
屠渾邪王地置武威張掖酒泉敦煌以通西域隔絕  
羌胡往來武威姑臧縣北三百里有白亭軍元和志云在馬城河東岸天寶十年哥舒翰置因白亭海為名也張掖東北一千五百餘里有地曰居延元狩二年霍去病出北地二千餘里過居延太初三年使路博德築居延澤上今甘州衛塞外居延故城是也亦曰居延塞元為亦集乃路地理志云在甘州北一千五百里城東北有大澤西北俱接沙磧乃漢居延故城明洪武初馮勝拔肅州進至掃林山亦集乃路是

也合黎山在張掖縣西北二百里弱水由此東北入  
居延澤遮盧障在肅州酒泉縣北二百四十里李陵  
與單于戰處敦煌即今廢沙州衛衛北抵大磧磧外  
即古伊吾盧地唐置伊州今為廢哈密衛也自雲中  
至敦煌六郡皆古雍州之域後為戎翟所據至秦漢  
始收復者其北皆臨大磧大磧即沙幕漢人謂之幕  
唐人謂之磧東西  
數千里南北遠者千里無水草不可駐牧雖禽獸亦  
不能居之 蔡傳雍之貢道有二其東北境則自積  
石至于西河其西南境則會于渭汭王氏樵曰東北  
當云西北蓋雍東距河若東北境則直浮西河不須  
浮于積石也渭按雍之西北境遠近不同各從其便

以至龍門不盡由積石其曰浮于積石者舉遠以該  
近耳會於渭汭言出渭之舟逆流而上與浮河之舟  
相會于渭水之北 閻百詩云渭汭汭字解有作水  
北者有作水之隈曲者有作水曲流者有作水中州  
者總不若說文汭水相入也於此處為確解左氏一  
書莊四年曰漢汭閔二年曰渭汭宣八年曰滑汭昭  
元年曰維汭四年曰夏汭五年曰羅汭二十四年曰  
豫章之汭二十七年曰沙汭定四年曰淮汭哀十五  
年曰桐汭水名下繫以汭者衆矣又何疑於禹貢渭  
按汭水相入與水之隈曲曰汭二義適相成而不相  
悖蓋兩水相入其水會襟帶處必有隈古詩大雅芮

行水金鑑卷之二十一  
一  
鞫之即芮即職方涇汭之汭水名也漢志扶風汭縣  
下云芮水出西北東入涇詩芮阮雍州川也師古曰  
阮讀與鞫同余因此悟水北曰汭之義蓋涇水東南  
流至邠州長武縣東芮水自平涼府靈臺縣界流經  
縣南而東注于涇公劉所居故豳城正在二水相會  
內曲之處及其後人衆而地不能容則又營其外曲  
以居之故曰止旅迺密芮鞫之即鄭箋曰水之內曰  
隩水之外曰鞫外即南內即北也推之洛汭亦然召  
誥太保以庶殷攻位于洛汭傳云洛水北今河南城  
也漢河南縣即周之王城東去鞏縣之什谷尚百有  
餘里召公治都邑之位豈逼側洛水入河之口乎知

洛汭則知渭汭矣或曰雍州有二渭汭從孔義則凡  
渭北之地皆為渭汭此渭汭當為漢高陵縣地後渭  
汭當為漢襄德縣地今朝同一渭汭而前後所指各別  
經豈支離若是邪曰地異而其為渭汭則同高陵者  
涇渭二水之會也襄德者河渭二水之會也均為水  
北均為水相入均為水之隈曲渭汭兼地而言不專  
指水口也 渭汭在河之西岸華陰朝邑韓城之地  
皆是也東與蒲州榮河分水此言雍之貢道故特以  
西岸言之韓汝節云今蒲州舜所都也渭水之北今  
朝邑縣南境渭水至此東入河折而北三十里即蒲  
州故舟皆會于渭北今按北船出龍門至榮河縣北

汾水入河處便當東轉泝汾無緣更順流而下至朝  
邑與南船會也且禹告成當堯時帝都平陽距蒲阪  
三百餘里韓城北連龍門東對汾口南北貢船相會  
當在其間曷為引蒲州以證乎禹貢雜指  
導黑水至於三危入於南海傳曰三危西裔之山山  
在西裔為黑水所經則禹當日導黑水實未嘗究其  
源但自雍導起經三危過梁境入南海傳曰自北而  
南經三危入南海非是蓋三危去黑水之源尚遠雍  
州經三危既宅傳同叔曰三危既宅此治黑水之成  
功也林三山曰三危距南海凡數千里禹導黑水至  
三危即得其故道從此以達南海之二說者講導水

甚明夫禹所導之黑水與雍梁二州之黑水同一水  
耳明導水經文之黑水則知雍梁二州之黑水矣自  
古言黑水者紛紛不一胡朏明先生言黑水三危並  
見雍州雍州以若水為黑水考據詳明然與經文入  
南海之文未有合至云梁州黑水別是一川非界雍  
之西者其說本之韓汝節終非篤論予故不取焉唯  
雲南通志載明人史秉信岡脊黑水辨以土人而言  
彼中之水道當自不謬姑引其文而以諸說參注之  
雖未嘗有所折衷然以此而求黑水當亦不遠矣辨  
曰昔辨黑水者有如聚訟或問余曰黑水地志出犍  
為謬矣漢書地理志犍為郡符縣下温水南至壘入黠水黠水亦南至壘入江愚按說文黠淺黃黑也廣雅黠黑也則是黠水即黑水矣犍為漢

郡今四川敘州府治此即張機所謂北金沙江一名黑水下流至敘州入岷江者是也 水經出張掖至燉煌過

三危入南海燉煌瓜州也實未嘗有此水跨越諸山

入南海武彞熊氏之說詳矣 武彞熊氏曰考古今地志雍州之地即無黑水所謂導黑水至於三危或

云在燉煌郡則今瓜州也曷嘗有此水踰跨諸山以至於南海哉若以河源崑崙推之崑崙山脊以西人跡所未到其東中一支則重岡積嶺直至終南太華皆是雍之南山而瓜州乃在河西五郡實當西北界上漢人所謂斷匈奴右臂者以其不與西戎相接也史當有錯 唐樊綽又指麗

水為黑水麗水金沙江也金沙果黑水乎余曰金沙

出吐蕃經麗江鶴慶姚安武定入馬湖會岷江入東

海此為黑水所謂入於南海何居 易氏曰樊綽書載麗水之入南海者有四西河與瀾

滄江合一也麗水與瀾若江合二也新豐川合勃弄諸水三也唐蒙所見盤江四也綽指麗水為黑水一名祿禪江而羅些城北有山即三危山其水從羅些城三危山西南行上流出於西羌吐蕃下流南至蒼望城又南至雙王道勿川有瀾若江西南來會南經驃國之東而入海羅些乃南詔吐蕃南北相距之地其西接吐蕃其東接劍南東北之西境程大昌辨之曰案此之麗水下流經驃入海而驃與東天竺接其南皆際南海即在南海一角其去雍梁分境之地實

為太遠故臣不敢主執其語也而秉信所指則與張機所考北金沙江源流相合機曰北金沙江源出吐蕃共隴川犂牛石下謂之犂牛河亦曰犂水訛犂為麗又名麗江即古麗水以其江產黃金故名金沙元憲宗取大理用革囊以濟者即此也其流經吐蕃鐵城橋東經麗江府巨津寶山二州又東經鶴慶府北勝州姚安府又自武定府北界黎溪州蒙氏僭封為四瀆之一亦即此江也又自武定下流入濟慮部彞人鑿桐槽船以通往來行旅遂名金沙渡又西過四川東川府一名黑水一名納彞然皆金沙江別名又經四川行都司會川建德德昌打衝等衛所又經烏蒙府又經馬湖府蠻夷長官司與馬湖江相合下流至敘州入岷江矣 或又曰程氏以麗水狹不足界二州西河與漢葉榆澤相貫廣可二十里其流正趨南海西河今大理海也西河果黑水乎余曰西河源一發於鶴分水嶺一發於浪穹罷谷此為黑水所謂惟雍州者何居 程大昌曰樊綽直以麗水為三危之黑水其語必得之夷俗所傳然臣疑其源流狹小不足以合二大州疆境又三危既宅載之雍州則三危當在雍不 當在梁今以唐史考之驃在蠻為南在蜀為西南於海亦為西南一角而麗水西行入驃始得南海則恐雍境決不斜入梁徵如此之多也至其所稱西河即與漢志葉榆澤相貫其廣處可二十里既足以界別兩州綽及道元皆謂此澤以葉榆所鍾得名則其水之黑似榆葉積漬所成凡其名實悉皆可證而古

黑水祠又正在益州即其地也而尚書通考載于京雲南志云西河即葉榆水在大理點蒼山下方圓三百餘里勢如人耳故名其源不出三危且在中慶西境去梁雍絕遠不可以別界二州矣

或又曰西遠曩方有大金沙江發源崑侖西北吐蕃地廣五里產黃金綠玉琥珀水晶其流正趨南海西南惟此水為大張機曾有考然則大金沙為黑水乎余曰河水之西為瀾滄再西為潞江又再西為大金沙大金沙者長廣三倍於瀾滄遠出蕃域上流已闊澄若重溟黝然深碧夏秋漲溢江色不變金齒黃貞元言之甚悉第此水去梁荒遠此為黑水所謂華陽者何居所謂至於三危者又何居

張機曰大金沙

江發源崑崙山西北吐蕃地即禹所導黑水也雖與雲南小金沙江及瀾滄潞江皆發源吐蕃然大金沙之源較三江最荒遠且其源於三江源邈不相近其下流亦十倍小金沙江及瀾滄二江之外按禹貢華陽黑水唯梁州黑水西河唯雍州周文安辨疑錄云甘州志甘州之西十里有黑水流入居延海肅州之

西北有黑水東流遐遠莫窮所之是其源入雍州之西流入梁州之西南其正西別流遠西極之外而無所據見地勢西北最高故能經西而西南也雲南志載金沙江出西番流至緬甸其廣五里徑趨南海得非黑水源出張掖流入南海者乎河源在中國西南直四川馬湖蠻邦之正西三千餘里雲南麗江宜撫司之西北一千五百餘里愚觀黃河源近雲南之地則大金沙江源自番雍之地南入緬海論雍梁間水唯此大耳此水為黑水無足辨矣黃貞元又云大金沙江瀾滄三水雖皆入南海大小遠近迥不同瀾滄僅瀾四分之一大金沙倍於瀾滄瀾滄所出地名在鹿石山在雍望俱可窮源上流亦狹大金沙江上源相傳近大宛國自里麻茶山至孟養極北不聞有所往號赤髮野人境峭壁不可梯繩弱水不任舟楫土人唯遠見川外隱隱有人馬形似殆西羌之域也今姑略其源唯自其經流支流入海可見者言之水流至孟養陸阻地有二大水自西北來一名大居江或云大車江一名橫柳江二水至此合流又名大盈江今騰越人總甸內諸水亦曰大盈江殆竊侈其名也江流至此彝人方名其為金沙江江中產綠玉黃金鈿子金精石墨玉水晶間出白玉濱江山下出琥珀舊志以琥珀綠玉出在瀾滄江者謬矣昔年王靖遠將定西追麓川叛賊思機發思卜發弟兄造船飛渡孟養及復與思祿盟誓江乾石爛乃許其過江者皆此江也滇人相傳名大金沙江若以別麗江北勝武定馬湖之小金沙江耳自此南流經宜猛莫噉莫即至猛掌有一江西來大金沙江又南下昔朴怕蚌猛莫猛外經蠻莫有一江源自騰越大盈經鎮彝南甸于崖受展西茶山古湧諸水伏流南牙山麓出經蠻莫入大金沙江江又經蠻法魯勒孟拱遮釐管屯大莒蒲山峽小莒蒲山峽課馬孟養怕崩山峽董鬼哭山戛撒昔年緬人攻孟養以船運兵餉到戛撒為孟養所敗者此江也正統中蔣雄率兵追思機發為

緬人所歷殺於江中亦此江也大約江自蠻莫以上山聳水陡正統中郭登自貢章順流不十日至緬甸者亦此江也下流經温板有一江源自騰越龍川江經界尾高黎共山隴川猛乃猛密所部莫勒江至太公城江頭城入於金沙江下流又經猛吉準古温板又名温板江又名流沙河皆金沙江也猛戛馬噠喇至江頭江中有大山極秀聳山有大寺又有一江源自猛辨洗戛母南來入大金沙江又經止即龍大馬革底馬撒蹄馬入南海其江至蠻莫以下地勢平衍闊可十五餘里舊志云五里者非也經南江益寬流益慢緬人善舟又善泅水操櫓楫者如涉平地至是江海之水瀦為一色矣合張機黃真元二說觀之大金沙江源流甚長自微外流入南海似與導黑水至於三危入於南海之經文相合

葉榆李仁甫黑水辨以瀾

滄江為黑水云蜀隴滇三省鼎立隴西南斜長入蜀滇西北斜長近隴蜀則尖長入滇滇隴之間如三足旖然黑水源正在旖頭故雍以黑水為西界以山論麗雪山與蜀松州諸山相接松去雍不遠計瀾滄之源當在雍之西元張道立使交趾由黑水入三崇山瀾滄經其麓地有黑水祠仁甫考究不無據

李仁甫名元陽號中谿太

和人嘉靖丙戌進士由庶常歷知荊州府罷歸四十餘年著述等身其辨黑水曰黑水之源固不可窮而入南海之水則可數也夫隴蜀無入南海之水唯滇之瀾滄江潞江皆由吐蕃西北來蓋與雍州相連但不知果出張掖地否水勢並洶湧皆入南海是豈所謂黑水者乎然潞江西南趨蜿蜒緬中內外皆發其於兼州之境若不相屬唯瀾滄由西北迤邐向東南徘徊雲南郡縣之間至交趾入海今水內皆為漢人水外即為緬甸則禹之所導按分別梁州界者唯瀾滄足以當之孟津之會曰粵人濮人以今考之皆在瀾滄江內則瀾滄江之為黑水無疑矣地理志謂南中山曰昆彌水曰洛山海經曰河水西流入於洛故瀾滄江又名洛水元史至元二年大理勸農官張立道使交趾並黑水跨雲南以至其國觀此則瀾滄江之為黑水益彰彰明矣大都為傳論者未嘗知三省地形但謂隴在蜀之北蜀在滇之東也而禹貢言黑水為雍梁二州之界又入南海故不得不疑其跨河知跨河非理又不得不疑其涇涸曾不知隴蜀滇三省鼎足而立隴則西南斜長入蜀滇則西北斜長近隴蜀則尖長入滇隴之間正如三足旖然黑水之源正在旖頭故雍以黑水為西界對西河而言也梁以黑水為南界對華陽而言也蓋各舉兩端若曰西河在雍東黑水在雍西華山在梁北黑水在梁南云爾故曰梁州可移而華陽黑水之梁不可移也雍梁之間其名黑水者非一然皆枝水而流又不入南海諸葛亮箋所謂朝發南鄭暮宿黑水之類皆非禹貢之黑水也而本朝康熙癸卯孝廉闕植兆通海人又有考以駁元陽曰導黑水至於三危入於南海是黑水自雍之西北而直出梁之西南明矣九州輿圖黑水出雍州汾關山汾關在崑崙北周文安辨疑錄云肅州之西北有黑水東流荒遠莫窮所之此與水經黑水出張掖雞山南至燉煌過三危山流入南海其說有合李中谿乃以瀾滄江當黑水新都楊慎亦主此說



又有指潞江為黑水者紛紛無據不知潞路所出地名在鹿石山在雍望俱可窮源上流亦狹若黑水遠出汾關上流已闊蓋若重冥黝若深碧夏秋漲溢江色不變自雍經梁獨來獨往瀾僅潞四分之一此水三倍於潞潞李氏以瀾滄為黑水吾未聞瀾滄盡界梁州之域况遠溯雍州耶雲南志載金沙江出西蕃流至緬甸徑趨南海非謂麗江入馬湖之金沙江蓋名為大金沙江者意即界雍梁二州入於南海之黑水也黑水出西北界雍梁入南海其源甚遠故其流獨大南至宣慰之鐵壁關江勢平闊金寶叢生則大金沙江之名所從來也潞江流出永昌至木邦為渣哩江在大金沙江之東瀾滄江流出蒙順界至姚關為錦龍江又在潞江之東夫瀾滄之水原雖出於吐蕃距滇不過十餘日其潞洄大理蒙化順寧永昌而入南海僅界梁州之西南不能遠界雍州說者以瀾滄當黑水謂瀾滄為梁州西南境內入南海之水則可謂禹貢雍梁之黑水則不可故論黑水者莫若以經為斷經之黑水一也唯雍唯梁同此也區區執滇以求黑水豈非狹視宇宙之山川而不知廣所見聞哉試以山驗之中國山勢岡脊大抵皆自西北來積石西傾岷山岡脊以東之水既入於河漢其岡脊以西之水即為黑水而入於南海大經大緯燦若日星關氏此說則與張機之南金沙江相合而其未言岡脊又本之蔡注與史氏同矣

考蔡注

云梁雍二州皆以黑水為界黑水自雍西北直出梁西南中國山勢岡脊皆自西北來積石西傾岷山岡脊以東之水既入於河漢岷山岡脊以西之水入於

南海即為黑水此說廣而有據何也鶴之山皆自西北來凡脊以東之水皆歸東海金沙江是也脊以西之水皆歸南海瀾滄江是也則此中為岡脊疇能易之如鶴走榆經山神峭舊名分水嶺草間湍出盡亂流耳北流者入漾工會金沙歸東海南流者合浪穹水匯為西洱歸南海夫咫尺間分水東南海之異於岡脊之說誠有脗合者人自不察耳或曰信斯言脊以西之水皆黑水瀾滄也西洱也大金沙也皆黑水矣此屬游移之見瀾滄西洱非黑水也酈道元謂西洱葉榆積漬所成謂之黑水豈岡脊以西皆榆乎余曰脊以西雖不必皆榆然西南之山干霄翳地隨刊朱施時山木積漬成渠何

必榆始黑也朱子云黑水從雍梁西界入南海不經中國知言哉山海西山經云崑崙之北西流於大扞軒轅之北洵水出焉南流注於黑水所指皆西南是黑水實不入中國也或又曰顧野王輿地志黑水由僂道入江余曰僂道烏蒙地也入南海者曰入江可為噴飯若夫遼東黑河趨東海肅州有黑水無跨河越脊理若水名黑水即北金沙入東海皆非禹貢之黑水不足辨矣 吾友閩中書詠刊 大清一統天下全圖據云本之 政治典訓方略會典一統志諸書其山川位置自無苟且按圖金沙江一源自阿六江一源自烏思藏皆南流至共龍旄牛石下枝分東流

為金沙江折而南又東流經永北府南又東至程湖又東至馬喇東瀘水即古若水自北來注之又東南流少西至大姚又西折而南又東至姚安姚州又東至元謀復西南流至楚雄府而旄牛石分枝之麗江南流至劔川又南流至浪穹折而東至大理太和為西洱即古葉榆水也又東流至賓川又東至定遠而與金沙江合又東南流至南安少西而瀾滄江自西南流至蘭州漾備江亦自西南流至蘭州與瀾滄江合又南流至點蒼山少東至打牛平又東南流與金沙江合又南流至茶山西又南流至元江少折而東為九龍江即瀾滄江流入安南界入於南海者也其

金沙江東南流至馬喇與瀘水合流處又東流至會川西孫水自北來注之又自會川東北流至大赤口羅羅小赤口羅羅少東其處亦名金沙江又東北至馬湖又東至敘州宜賓流入岷江而金沙江又自大赤口羅羅分枝南流至東川之西會理之東又南流至烏蒙之西祿勸之東又西南流至雲南滙為昆明池即滇池也據此則金沙江瀾滄江瀘水孫水皆異源同流合而入於南海者而其分枝則又入於岷江入於滇池皆非禹貢之黑水也張機以大盈江為大金沙定為禹貢之黑水閻氏圖亦載之大盈江自西天竺萬山中來西南流有檳榔江自西來注之合流

至孟養折而東至猛卯有麓川江自北來注之合流至猛密而潞江亦自北來注之合流至緬甸之東八百媳婦之西入於南海而大盈江之來自西天也圖中亦莫究其源按而求之蓋在星宿海大流沙之西北抵三危過沙州至哈密漢之燉煌郡北境即伊吾廬也括地志言黑水出伊吾南流絕三危山此正與圖相合亦與張機所稱大金沙江發源崑崙山西北吐蕃地相合此乃禹貢之黑水無可疑者經云華陽黑水唯梁州黑水西河唯雍州蓋伊吾沙州為雍之西境雅黎天全徼外吐蕃以及於南海皆梁之西境是可見黑水源流至遠且大如此真足以界二州之



年詔

揚州沿於江海達於淮泗東坡書傳云吳王夫差闕  
溝通水而江始有入淮之道禹時則無之愚按吳之  
通水有二焉左氏傳哀公九年吳城邗溝通江淮此  
自江入淮之道也哀十三年會黃池注云陳留封止縣南有黃亭近濟水此自  
淮入汴之道也閩若璩云按此句從初刊本增補 困學紀聞

吳越春秋吳將伐齊自廣陵闕江通淮曰渠水漢志  
江都縣有渠水首受江北至射陽入湖是也又名中  
瀆水水經注中瀆水首受江於江都縣縣城臨江昔  
吳將伐齊北霸中國自廣陵城東南築邗城城下掘  
深溝謂之韓江亦曰邗溟溝自廣陵出山陽白馬湖

逕山陽城西又東謂之山陽浦又東入淮謂之山陽  
口是也山陽本漢射陽縣屬臨淮郡晉義熙中改曰  
山陽 吳幼清云江北淮南地高於水雖曰溝通江  
淮二水之間掘一橫溝兩端築隄壅水在溝中若欲  
行舟須自江中拽舟上溝行溝既盡又拽舟下淮江  
淮二水實未嘗通流也渭按後世堰閘之法可以隨  
時啓閉舟至則開舟過則閉今運河諸閘皆然不聞  
有拽舟之事邗溝當亦如此且左氏明言溝通江淮  
何以云未嘗通流邪 或問吳自哀九年溝通江淮  
之後十年伐齊十一年又伐齊十二年會魯於橐臬  
十三年會晉於黃池國語云夫差既退使告勞於周

曰余沿江沂淮闕溝深水出於商魯之間其所沿沂者非即邗江至末口之道乎曰非也射陽以南之水引江以通湖不可謂之江射陽以北諸路由湖以達淮不可謂之淮其所稱沿江沂淮蓋即禹貢揚州之貢道耳何以知之邗溝之開注但云通糧道其水未必能深廣觀隋開皇中山陽瀆既開而猶不勝戰艦則吳人所乘餘皇戈船之類不可由此瀆明矣故哀公十年公會吳伐齊左傳云徐承帥舟師將自海入齊齊人敗之吳師乃還十三年黃池之役於越入吳國語云越師沿海沂淮以絕吳路嚮使伐齊由邗溝則徐承何獨帥舟師泛海其自會而歸越師欲絕

其路亦必沂江而不沂淮矣故知吳王沿江沂淮仍用禹貢揚州之貢道也禹貢維指

管子曰粟行三百里則國無一年之積粟行四百里則國無二年之積粟行五百里則衆有饑色係武曰千里餽糧士有饑色食敵一鍾當吾二十鍾是言粟不可推移則糴之者無利糴之處受害按禹貢百里賦納總二百里納銓三百里

使天下飛芻輓粟納結服四百里納粟五百里米則物重而粗者為近賦物輕而精者為遠賦若數千里漕運其費百倍秦欲攻匈奴運糧也輓粟謂引車兩也音晚起於黃腫直瑞反又音誰

瑯琊負海之郡轉輸北河黃腫二縣並在東萊言自東萊及瑯琊綠海諸郡皆令轉輸至北河也黃即今率三十鍾而致一石六斛四斗為鍾

黃縣腫即今文登縣並今東牟郡縣瑯琊今高密瑯琊郡地北河今朔方之北河也計其道路所費凡用百九十二斛乃得一石 杜佑通典

漢興漕轉山東粟以給中都官歲不過數十萬石索隱曰說文云漕水轉穀也一云車運曰轉水運曰漕中都猶都內也皆天子之倉府以給中都官者即今太倉以稽官儲者是也史記平準書

漢初致山東之粟不過歲數十萬石至孝武而歲至六百萬石幾十倍其數矣雖征歛苛煩取之無藝亦由河渠疏利致之有道也文獻通考

孝文時賈誼上說曰天子都長安而以淮南東道為奉地鏹道數千不輕致輸郡或乃越諸侯而遂調均發徵至無狀也古者天子地方千里中之而為都輸將繇使其遠者不在五百里而至公侯地百里中之而為都輸將繇使遠者不在五十里而至輸者不苦其繇繇者不傷其費故遠方人安及秦不能分人寸

地欲自有之輸將起海上而來一錢之賦數十錢之費不輕而致也上之所得甚少而人之所苦甚多也通典

當是時漢孝武建元中通西南夷作者數萬人千里負澹饋糧率十餘鍾致一石音義曰鍾六斗四升又興十餘萬人築衛朔方轉漕甚遼遠自山東咸被其勞史記平準書

鄭當時為大農言曰異時關東漕粟從渭中上度六月而罷而漕水道九百餘里時有難處引渭穿渠起長安並南山下至河三百餘里徑易漕度可令三月罷而渠下民田萬餘頃又可得溉田此損漕省卒而益肥關中之地得穀天子以為然令齊人水工徐伯表索隱曰舊說徐伯表水工

姓名也小顏云以為表者循行穿渠之處而表記之若今豎標表不是名也

悉發卒徐廣曰一云悉眾數萬人穿漕渠

三歲而通通以漕大便利其後漕稍多而渠下之民頗

得以溉田矣其後河東守番係言漕從山東西索隱曰番音婆又音潘詩

亡甚多而亦煩費穿渠引汾正義曰括地志云汾水源自嵐州靜樂縣北百三十里管涔山北東南流入并

州即西南流入至絳州蒲州入河也溉皮氏汾陰下正義曰括地志云皮氏故城在絳州龍門縣西百三十步自秦漢魏晉皮氏縣皆治也汾

陰故城俗名殷湯城在蒲汾陰縣北九里漢汾陰縣是也引河灌汾陰蒲坂下度可得五千頃

五千頃故盡河孺棄地韋昭曰孺音而緣反謂綠河邊地也民芟牧其

中耳索隱曰芟乾草也謂民牧芟及牧蓄於中也今槩田之度可得穀二百萬石以

上穀從渭上與關中無異而砥柱之東可無復漕天子

以為然發卒數萬人作渠田數歲河移徙渠不利則田

者不能償種久之河東渠田廢予越人令少府以為稍

入如淳曰時越人有徙者以田與之其租稅入少府索隱曰其田既薄越人徙居者習水利故與之而稍少其稅入之於少府

其後人有上書欲通褒斜道韋昭曰褒中縣也斜谷名音邪瓚曰褒斜二水名

源出褒城縣西北九十八里銜嶺山與褒水同源而派流漢書溝洫志褒水通河斜水通渭皆以行船是也按褒城即褒中縣也

及曹事下御史大夫張湯湯問其事因言抵蜀從故道正義曰括地志云鳳州兩當縣

本漢故道縣也在州之西五十里故道多阪回遠今穿褒斜道少阪近四百里

而褒水通沔斜水通渭皆可以行船漕漕從南陽正義曰南陽縣

即今鄧州也上沔入褒褒之絕水至斜間百餘里以車轉從斜

下下渭如此漢中之穀可致山東從沔無限正義曰限之言多也山東謂河

南之東山南之東及江南淮南皆經砥柱主運今並從沔便於三門之漕也

便於砥柱之漕且褒斜材木竹箭之饒擬於巴蜀天子以為然拜湯子卬為漢中守



發數萬人作褒斜道五百餘里道果便近而水湍石

徐廣曰湍字一本作澗

史記河渠書

番係欲省底柱之漕穿汾河渠以

為溉田作者數萬人鄭當時為渭漕渠回遠鑿直渠自長安至華陰作者數萬人朔方亦穿渠作者數萬人各

歷二三碁功未就費亦各巨萬十數

史記平準書

漢武帝元光六年春穿漕渠通渭

漢書武帝本紀

漢明帝永平十二年夏四月遣將作謁者王吳修汴渠

後漢書明帝本紀

致堂胡氏曰世言隋煬帝開汴渠以幸揚州文士考禹貢言堯都冀州居河下流而入都貢賦重于用民力故每州必記入河之水獨淮與河無相通之道求

之故迹而不得乃疑汴水自禹以來有之不起於隨世既久遠或名鴻溝或名官渡或名汴渠大概皆自河入淮故淮可引江湖之舟以達於冀也今據後漢書則平帝時已有汴渠曰河汴決壞則謂輸受之所也至是發卒數十萬修渠隄則平地起兩岸而汴水行其中也十里立一水門更相洄注則以節制上流恐河溢為患也是正與今之汴渠制度無異特未有導洛之事耳史曰渠隄自滎陽而東則上疑其為鴻溝下疑其為官渡者恐未得其要官渡直黃河也故袁曹相距沮授曰悠悠黃河吾其濟乎汴渠自西而東鴻溝乃橫亘南北故曰未得其要也獨所謂自禹

以來有汴者此則不易之論也 文獻通考

鄧訓字平叔 南陽新野人 永平中理虜沱石白河從都慮至羊

腸倉 今嵐州羊腸坂是也 欲令通漕太原吏人苦役連年無成轉運所

經三百八十九隘前後沒溺死者不可勝算建初三年

拜訓謁者使監領其事訓考量隱括知大功難立具以

上言肅宗從之遂罷其役更用驢輦歲省費億萬計全

活徒士數千人遷護烏桓校尉 後漢書古今注云永平十年作常山呼沱河蒲吾渠通漕船也即此

漢章帝建初三年夏四月己巳罷常山呼沱石白河漕

後漢書章帝紀石白河名也在今定州唐縣東北時鄧訓上言此漕難成遂罷之

虞詡遷武都太守先是運道艱險舟車不通驢馬負載

倂五致一詡乃自將吏士按行川谷由沮至下辯 沮及下辯並縣

名沮今興州順政縣也下辯今成州同谷縣也沮音七余反 數十里皆燒石剪水開漕船道 續漢書曰下辯東三十餘里有峽中當泉水生大石障塞水流每至春夏輒溢沒秋稼壞敗營郭詡乃使人燒石以水灌之石皆圻裂因鑄去石遂無泛溺之患也 以

人倂直催借傭者於是水運通利歲省四千餘萬 後漢書虞詡傳

興州今陝西漢中府略陽縣成州今鞏昌府成縣漢並屬武都郡唐為興州成州明一統志載虞詡武都太守開漕船道水運通利初到郡戶總盈萬詡始還流散增至四萬戶明徐貞明作西北水利議亦曰虞詡復三郡激河浚渠為屯田而省內郡之費皆以表揚其有功德於民也今陝西通志詡名宦傳竟軼其事

漢獻帝建安九年春正月濟河過淇水入白溝以通糧道 三國志

漢獻帝建安十一年鑿渠自滹沱入泝水 泝音孤 名平虜渠 三國志

又從洵河口 洵音句 鑿入潞河名泉州渠以通海 三國志

三國時遼西烏桓以素尚兄弟入塞曹操將討之乃鑿二渠以通運一自滹沱入泝水謂之平虜渠一自

行水全卷九十一

洶口入潞河謂之泉州渠以通海運說文派水出鴈門後人戍夫山東北入海水經洶水出無終西山西北流至平谷又南流入于潞河又東合泉水渠口曹操所築也渠東至樂安亭南與瀘水合入海按二水當時通漕以制遼左所謂平虜渠者在今都城之南疑即滹沱入運處也唯泉州渠乃在京北而東入遼海不知定在何處若因其遺跡通之以饋平盧遼西亦一便也泉州故城在幽州雍奴筆塵

漢獻帝建安十八年九月鑿渠引漳水入白溝以通河

三國志 水經注是年魏太祖鑿渠引漳水東入清洹以通河漕名曰利漕渠

漢獻帝建安二十四年上穿陽渠引洛水為漕百姓得

其利

後漢書張純傳 陽渠在洛陽城南

賈逵為豫州刺史州南與吳接達外修軍旅內治民事過鄆汝造新陂又斷山溜長谿水造小弋陽陂又通運

渠二百餘里所謂賈侯渠者也

三國志賈逵傳 逵黃初中刺豫州考績二千石以下不如法文帝稱為

真刺史布告天下以豫州為法逵卒吏民追思為刻石立祠見一統志

鄧艾遷尚書郎時欲廣田蓄穀為滅賊資使艾行陳項以東至壽春艾以為田良水少不足以盡地利宜開河渠可以引水澆溉大積軍糧又通運漕之道乃著濟河論以喻其指又以為昔破黃巾因為屯田積穀許都制四方今三隅已定事在淮南每大軍征舉運兵過半功費巨億以為大役陳蔡之間上下田良可省許昌左

右諸稻田并水東下令淮北二萬人淮南三萬人十二分休常有四萬人且田且守水豐常收三倍於西計除衆費歲完五百萬斛以為軍資六七年間可積三千萬餘斛於淮北此則十萬之衆五年食也以此乘敵無不克矣宣帝善之事皆施行正始二年乃開廣漕渠每東南有事大軍興舉泛舟而下達於江淮資食有儲而無水患艾所建也

三國志鄧艾傳

魏正始三年三月奏開廣漕渠引河入汴既東南諸陂始大佃於淮北四年秋九月大興屯守廣開淮陽百尺二渠又修諸陂於潁之南北萬餘頃自是淮北倉庾相望壽陽至于京師農官屯兵連屬焉

晉書宣帝本紀

大皇時使陳勳於句容縣鑿開水道立十二埭以通

吳會諸郡故船不復由京口

吳錄

晉武帝泰始十年鑿陝南山決河東注洛以通運漕

晉書

武帝本紀

杜預都督荊州舊水道唯沔漢達江陵千數百里北無通路又巴止湖沅湘之會表裏山川實為險固荆蠻之所恃也預乃開楊口起夏水達巴陵千餘里內瀉長江之險外通零桂之漕南土歌之曰後世無叛由杜翁孰識智名與勇功

晉書杜預傳

李矩為汝陰太守永嘉初使矩與汝南太守袁孚率衆修洛陽千金塢以利運漕

晉書李矩傳

河南十二縣境簿曰河南縣城東十五里有千金竭  
洛陽記曰千金竭舊堰穀水魏時更修此堰謂之千  
金竭積石爲竭而開溝渠五所謂之五龍渠渠上立  
竭竭之東首立一石人石人腹上刻勒云太和五年  
二月八日庚戌造築此竭更開溝渠此水衡渠上其  
此有誤當云此水衡渠止其水助其堅也必經年歷世是故部立石人  
以記之云爾蓋魏文帝修王張故績也竭是都水使  
者陳協所造也語林曰陳協數進阮步兵酒後晉文  
王欲修九龍堰阮舉協文王用之掘地得古承水銅  
龍六枚堰遂成水歷竭東注謂之千金渠逮於晉世  
大水暴注溝瀆泄壞又廣功焉石人東脇下文云太

始七年六月二十三日大水并瀑出常流上三丈蕩  
壞二竭五龍泄水南注瀉下加歲久漱齧每滂即壞  
歷載消棄大功今故爲今竭宋本作損棄大  
功故爲今竭更於西開泄  
名曰代龍渠地形正平誠得爲宋本  
作瀉泄至理千金不與  
水勢激爭無緣當壞由其卑下水得輸宋本  
作輸上漱齧故  
也今增高千金於舊一丈四尺五龍自然必歷世無  
患若五龍歲久復壞可轉於西更開二竭二渠合用  
二十三萬五千六百九十八功以其年十月二十三  
日起作功重人少到八年四月二十日畢代龍渠即  
九龍渠也後張方入洛破千金竭公私賴之水積年  
渠竭頽毀石砌殆盡遺基見存朝廷太和中修復故

竭按千金竭石人西脇下文云若溝渠久疏深引水者當於河南城北石磧西更開渠北出使首孤立故溝東下因故易就磧堅便時事業已訖然後見之加邊方多事人力苦少又渠竭新成未患於水是以不敢預修通之若於後當復興功者宜就西磧故書之於石以遺後賢矣雖石磧淪敗故迹可馮水經注

兖州既平

廟諱避

患水道險澀糧運艱難用督護聞人夔謀堰呂梁水樹柵立七埭為派擁二岸之流以利運漕晉書

謝幼度傳

隋文帝受禪薛胄三遷兖州刺史先是兖州城東沂泗二水合而南流汎濫大澤中胄遂積石堰之決令西注

陂澤盡為良田又通轉運利盡淮海百姓賴之號為薛

公豐兗渠

北史薛胄傳

隋文帝開皇三年朝廷以京師倉廩尚虛議為水旱之備於是詔於蒲陝號熊伊洛鄭懷邵衛汴許汝等水次十三州置募運米丁又于衛州置黎陽倉洛州置河陽倉陝州置常平倉華州置廣通倉轉相灌注漕關東及汾晉之粟以給京師又遣倉部侍郎韋瓚向蒲陝以東募人能于洛陽運米四十石經砥柱之險達於常平者免其征戍其後以渭水多沙流有深淺漕者苦之四年詔曰京邑所居五方輻輳重關四塞水陸艱難大河之流波瀾東注百川海濱萬里交通雖三門之下或有危

慮若發自小平陸運至陝還從河水入于渭川兼及上流控引汾晉舟車來去為益殊廣而渭川水力大小無常流淺沙深即成阻闕計其途路數百而已動移氣序不能往復操舟之役人亦勞止朕君臨區宇興利除害公私之弊情甚愍之故東發潼關西引渭水因藉人力開通漕渠量事成功易可成就已令工匠巡歷渠道觀地理之宜審終久之義一得開鑿萬代無毀可使官及私家方舟巨舫晨昏漕運沿泝不停旬日之功堪省億萬誠知時當炎暑動致殷勤然不有暫勞安能永逸宣告人庶知朕意焉於是命宇文愷率水工鑿渠引渭水自大興城東至潼關三百餘里名曰廣通渠轉運通利

關內賴之 其後山東頻年霖雨杞宋陳亳曹戴譙潁等諸州達於滄海皆困水災所在沈溺十八年天子遣使將水工巡行川源相視高下發隨近丁以疏導之因乏者開倉賑給前後用穀五百餘石遭水之處租調皆免自是頻有年矣 隋書食貨志

隋書高祖本記 隋文帝開皇四年六月壬子開渠自渭達河以通運漕

蘇孝慈為太子右衛率兵部尚書明年上於陝州置常平倉轉輸京下以渭水多沙流乍深乍淺漕運者苦之于是決渭水為渠以屬河令孝慈督其役渠成上善之

隋書蘇孝慈傳

開皇中徵行爲開漕渠大監部率水工鑿渠引渭水經大興城北東至潼關漕運四百餘里關中賴之名曰富人渠

北史郭衍傳

隋文帝開皇七年夏四月庚戌於揚州開山陽瀆以通

運漕

隋書高祖本記

隋煬帝大業元年辛亥發河南諸郡男女百餘萬開通濟渠自西苑引穀洛水達於河自板渚引河通於淮

隋書

煬帝本紀

昔禹於滎澤下分大河爲陰溝出之淮泗至浚儀西北復分二渠其後或曰鴻溝或曰浪宕渠或曰浚儀渠或曰石門渠石門渠東合濟水與河渠東注至於

敖山之北而兼汴水又東至滎陽之北而旃然之水東流入汴滎陽之西有廣武二城汴水自二城間小澗中東流而出濟水至此乃絕桓温將通之而不果者晉太和之中也劉裕浚之始有湍流奔注以漕運者義熙之間也皇甫誼發河南丁夫百萬開之起滎陽入淮千有餘里更名之曰通濟渠者隋大業之初也後世因其利焉

曾子固集

隋煬帝大業四年春正月乙巳詔發河北諸郡男女百餘萬開永濟渠引沁水南達于河北通涿郡

隋書煬帝本紀

大業元年發河南道諸州郡兵夫五十餘萬開通濟渠自河起滎澤入淮千餘里又發淮南諸州郡丁夫



十餘萬開邦溝自山陽淮至于揚子入江三百餘里  
水面闊四十步造龍舟兩岸為大道種榆柳自東郡  
至江都二千餘里樹蔭相交每兩驛置一宮為停頓  
之所自京師至江都離宮四十餘所三年六月敕  
開永濟渠引汾水入河又自汾水東北開渠合渠水  
至於涿郡二千餘里通龍舟

大業雜記 唐允恭曰綱鑑大業元  
年發丁百萬開通濟渠自西苑引穀

洛水達於河復自板渚引河入汴引汴入泗以達於濟又發民十萬開邦溝入  
江溝廣四十步傍築御道樹以柳發明云邦溝即官河在揚州府城北一百二  
十里昔吳王夫差將北霸中國自廣陵城東南邦城下築深溝謂之邦江亦曰  
邦溝自江東北通射陽湖又西北入淮一名漕河江溝未詳處所愚按江字連  
上當以開邦溝入江句絕溝字連下當以溝廣四十步為句觀大業拾遺  
可知發明以開邦溝入江溝為句且云江溝未詳處所良由句讀誤也

睢陽有王氣出占天耿純臣奏後五百年當有天子  
興煬帝觀廣陵圖翼日與大臣言欲泛巨舟自洛入

河自河達海入淮至廣陵時有諫議大夫蕭懷靜奏  
曰臣聞秦始皇時金陵有王氣始皇使人鑿蠶砥柱  
王氣遂絕今睢陽有王氣又陛下喜在東南欲泛孟  
津又慮危險况大梁西北有故河道乃是秦時王離  
畝水灌大梁之處欲乞陛下廣集兵夫於大梁起首  
開掘西自河陰引孟津水入東至淮放孟津水出此  
間地不過千里况於睢陽境過一則路達廣陵二則  
鑿穿王氣帝聞奏大喜羣臣皆默帝乃出敕朝堂有  
諫開河者斬之詔以征北大總管麻叔謀為開河都  
護以蕩寇將軍李淵為副使淵稱疾不赴即以左屯  
衛將軍令狐達代淵為開渠副使都督自大梁起首

於樂臺之北建修渠所署命之爲卞渠因名其府署  
爲卞渠上源傳舍也詔發天下丁夫男十五以上五  
十以下者皆至如有隱匿者斬帝以河水經於卞乃  
賜卞字加水丁夫計三百六十萬人乃更五家出一  
人或老幼或婦人等供饋飲食又令少年驍卒五萬  
人各執杖爲吏如節級隊長之類共五百四十三萬  
餘人叔謀乃令三分中取一分人自上源而西至河  
陰通連古河道迤邐趨愁思臺而至北去又令二分  
丁夫自上源驛而東去乃隋大業五年八月上旬建  
功畚鍤旣集東西橫布數千里及開汴梁盈灌口點  
檢丁夫約折二百五十萬人其部役兵士舊五萬人

折二萬三千人功旣畢上言於帝決下口注水入汴  
梁帝自洛陽遷駕大渠詔江淮諸州造大船五百隻  
使命至急如星火民間有配著造船一隻者家產破  
用皆盡猶有不足枷項笞背然後鬻貨男女以供官  
用龍舟旣成泛江沿淮而下至大梁又別加修飾舳  
艫相繼連接千里自大梁至淮口聯綿不絕錦帆過  
處香聞百里

開河記

通典汴渠在河南府河陰縣南二百五十步今名通  
濟渠隋煬帝開導西通河洛南達江淮

河陰後屬孟州

汴州有

通濟渠隋煬帝開引黃河水以通江淮漕運兼引汴  
水即浪洑

與浪洑同

渠也

隋志在浚儀縣

九域志汴水古通濟渠也在

開封縣周語穀洛鬪注云洛在王城之南穀在王城之北東入於灑至靈王時穀水盛出于王城之西而

南流合於洛水

山海經澗水西北流注於穀水通典穀水本澗水經苑中入於洛

板渚水經河水

又東合汜水又東經板城北注云有津謂之板城渚

口

在孟州汜水

左傳吳城邗溝通江淮注云於邗江築城穿

溝東北通射陽湖西北至末口入淮通糧道也今廣

陵韓江是隋開邗溝自山陽至揚子入江渠廣四十

步自楚州寶應縣北流入淮

困學紀聞閻若璩按王氏引杜注末口與水經注舍足證今注疏作宋

口者非又自楚州寶應縣十字宜街蓋

上文是淮入江不應旋云江入淮也

大業六年十二月敕開江南河自京口至餘杭郡八

百餘里水面闊十餘丈又擬通龍舟驛宮草頓並足

欲東巡會稽

大業雜記

隋煬帝開通濟渠自東都西苑引穀洛之水達於河

又自板渚引河水達於汴又自大梁東引汴水入泗

達於淮又自山陽至揚子達於江於是江淮河汴之

水相屬而為一矣煬帝又開永濟渠因沁水南連於

河北通涿郡又穿江南河自京園至杭州八百里蓋

今所用者皆其舊迹也夫會通河自濟汶以下江河

淮泗通流為一則通濟之遺也滹沱豫章則永濟之

遺也煬帝此舉為其國促數年之祚而為後世開萬

世之利可謂不仁而有功者矣秦皇亦然今東起遼

陽北至上郡延袤萬里有邊城之利皆非長城之墟

耶嗟夫此未易與一二淺見者道也 筆塵

隋雖無道然開此三渠以通天下漕百世之後賴以

通濟 通漕類編

卷第九十二

行水金鑑

運河水

卷第九十二

唐都長安而關中號稱沃野然其土地狹所出不足以給京師備水旱故常轉漕東南之粟高祖太宗之時用物有節而易贍水陸漕運歲不過二十萬石故漕事簡自高宗以後歲益增多而功利繁興民亦罹其弊矣初江淮漕租米至東都輸含嘉倉以車或駝陸運至陝而水行來遠多風波覆溺之患其失常十七八故其率一斛得八斗為成勞而陸運至陝纔三百里率兩斛計庸錢千民送租者皆有水陸之值而河有三門底柱之險

唐書食貨志

唐高祖武德八年水部郎中姜行本請於隴州開五節

堰引水通運許之舊唐書食貨志隴州汧源縣有五節堰引隴川

水通漕武德八年水部郎中姜行本開唐書地理志汧源縣

州陝西通志云

唐高宗顯慶元年苑西監褚朗議鑿三門山為梁可通

陸運乃發卒六千鑿之功不成其後將作大匠楊務廉

又鑿為棧以輓漕舟輓夫繫二鈇於曾而繩多絕輓夫

輒墜死則以逃亡報因繫其父母妻子人以為苦唐書食

貨志

唐高宗咸亨三年關中饑監察御史王師順奏請運晉

絳州倉粟以贍之上委以運職河渭之間舟楫相繼會

於渭南自師順始之也舊唐書食貨志

趙州昭慶縣有澧水渠儀鳳三年令李避廟諱開以溉田通

漕唐書地理志昭慶今為直隸真定府趙州隆平縣澧水渠在縣城下

朗州武陵縣有永泰渠武先宅中刺史胡處立開通漕

且為火備唐書地理志武陵縣今為湖廣常德府附郭一統志云永泰渠在府城北

鳳翔府號縣西北有昇元渠引汧水至咸陽武垂拱初

運岐隴水入京城有高泉渠如意元年開引水入縣城

泗州連水縣故有新漕渠南通淮武垂拱四年開以通

海沂密等州唐書地理志連水縣今為江南淮安府安東縣今安東縣有

官河南通市河下流三里為東連閘三十餘丈上流三十里為西

連閘如東連源自西北大湖來東南入淮殆即當時之遺跡歟

陳留郡開封縣有湛渠武后載初元年引渠注白溝以通

曹充賦稅唐書地理志開封縣今為河南開封府祥符縣一統志湛渠在府城外

唐則天皇后大足元年六月於東都立德坊南穿新潭

安置諸州租船舊唐書食貨志河南府河南縣有洛漕新潭大足

元年開以置租船唐書地理志河南縣今為河南府洛陽縣

唐中宗神龍三年滄州刺史姜師度於薊州之北漲水

為溝以備奚契丹之寇又約舊渠傍海穿漕號平虜渠

以避海難運糧舊唐書食貨志

韋景駿神龍中歷肥鄉令縣北瀕漳連年泛溢人苦之

舊防迫漕渠雖峭岸隨即壞決景駿相地勢益南千步

因高築鄣水至隄址輒去其北燥為腴田又維艚以梁

其上而廢長橋功少費約後遂為法

唐書韋景駿傳舊唐書景駿傳云漳水舊有架柱長橋橋自是無復水患至今賴焉

泗州盱眙縣有直河太極元年敕使魏景清引淮水至

黃土岡以通揚州唐書地理志注盱眙縣今為江南鳳陽府屬一統志直河在泗州東北二十里則與盱眙縣通流可知也

齊澣定州義豐人開元初為汴州刺史以淮至徐城險

急鑿渠十八里入清水人便其漕唐書齊澣傳

姜師度魏人開元初遷陝州刺史州西太原倉控兩京

水陸二運常自倉車載米至河際然後登舟師度遂鑿

地道自上注之便至水次所省萬計再遷同州又於朝

邑河西二縣界就古通靈陂擇地引雒水及堰黃河灌

之以種稻田凡二千餘頃內置屯十餘所收穫萬計特

加金紫光祿大夫

舊唐書姜師度傳

唐明皇開元二年河南尹李傑奏汴州東有梁公堰年

久堰破江淮漕運不通發汴鄭丁夫以濬之省功速就

公私深以為利

舊唐書食貨志

李傑本名務光滏陽人開元初為

河南尹先是河汴間有梁公堰年久堰破江淮漕運不

通傑奏調發汴鄭丁夫以浚之省功速就公私深以為

利刊石水濱以紀其蹟尋代宋璟為御史大夫

舊唐書李傑傳

孟

州河陰縣有梁公堰在河汴間開元二年河南尹李傑

因故渠浚之以便漕運

唐書地理志河陰縣今為河南開封府屬

華州華陰縣西二十四里有敷水渠開元二年姜師度

鑿以洩水害五年刺史樊忱復鑿之使通渭漕

唐書地理志華陰縣今

為陝西西安府屬陝西通志敷水渠在華陰縣西三十里源出大敷谷

唐明皇開元十年二月四日伊水泛漲毀都城南龍門

平地水深六尺以上入漕河水次屋舍樹木蕩盡

舊唐書

五行志

唐明皇開元十四年七月十四日渾水暴漲流入洛漕

漂沒諸州租船數百艘溺死者甚眾

舊唐書五行志

唐明皇開元十五年正月令將作大匠范安及檢行鄭

州河口斗門先是洛陽人劉宗器上言請塞汜水舊汴

河口於下流滎澤界開梁公堰置斗門以通淮汴擢拜

左衛率府曹曹至是新漕塞行舟不通貶宗器等安及

遂發河南府懷鄭汴滑三萬人疏決兼舊河口旬日而

唐明皇開元十八年六月乙丑東都渥水暴漲漂損揚  
楚淄德等州租船 壬午東都洛水泛漲壞天津永濟  
二橋及漕渠斗門漂損提象門外助鋪及仗舍又損居  
人廬舍千餘家 舊唐書五行志

唐明皇開元十九年宣州刺史裴耀卿朝集京師 避宗廟諱  
訪以漕事耀卿條上便宜曰江南戶口多而無征防之  
役然送租庸調物以歲二月至揚州入斗門四月已後  
始度淮入汴常苦水淺六七月乃至河口而河水方漲  
須八九月水落始得上河入洛而漕路多梗船檣阻隘  
江南之人不習河事轉僱河師水手重為勞費其得行

日少阻滯日多今漢隋漕路瀕河倉廩遺跡可尋可於  
河口置武牢倉鞏縣置洛口倉使江南之舟不入黃河  
黃河之舟不入洛口而河陽柏崖太原永豐渭南諸倉  
節級轉運水通則舟行水淺則寓於倉以待則舟無停  
留而物不耗失此甚利也 避宗廟諱 宗初不省二十一年耀卿  
為京兆尹京師雨水穀踊貴 避宗廟諱 宗將幸東都復問耀卿  
漕事耀卿因請罷陝陸運而置倉河口使江南漕舟至  
河口者輸粟於倉而去縣官僱舟以分入河洛置倉三  
門東西漕舟輸其東倉而陸運以輸西倉復以舟漕以  
避三門之水險 避宗廟諱 宗以為然乃於河陰置河陰倉河西  
置柏崖倉三門東置集津倉西置鹽倉鑿山十八里以

行水金鑑卷九十三  
五



陸運自江淮漕者皆輸河陰倉自河陰西至太原倉謂之北運自太原倉浮渭以實關中廟諱宗大悅拜耀卿為黃門侍郎同中書門下平章事兼江淮都轉運使以鄭州刺史崔希逸河南少尹蕭炅為副使益漕晉絳魏濮邢貝濟博之租輸諸倉轉而入渭凡三歲漕七百萬石省陸運備錢三十萬緡是時民久不罹兵革物力豐富朝廷用度亦廣不計道里之費而民之輸送所出水陸之直增以函脚營窖之名民間傳言用斗錢運斗米其糜耗如此及耀卿罷相北運頗艱米歲至京師纔百萬石二十五年遂罷北運而崔希逸為河南陝運使歲運百八十萬石其後以太倉積粟有餘歲減漕數十萬石

唐書食貨志

裴耀卿遷京兆尹明年秋雨害稼京師饑帝將幸東都名問所以救人者耀卿曰陛下既東巡百司畢從則太倉三輔可遣重臣分道賑給自東都益廣漕運以實關輔關輔既實則乘輿西還事篋不濟且國家大本在京師但秦地狹水旱易匱貞觀永徽時祿廩者少歲漕粟二十萬略足今用度寔廣運數倍且不支故數東幸以就厥粟為國大計臣願廣陝運道使京師常有三年食雖水旱不足憂今天下輸丁約四百萬使丁出百錢為陝洛運費又益半為營窖用分納司農河南陝州又令租米悉輸東都從都至陝河益湍沮若廣漕路變陸為

水所支尚贏萬計且河南租船候水始進誤工不便河漕處處停留易生隱盜請置倉河口以納東租然後官自催載分入河洛度三門東西各築廩倉自東至者東倉受之三門迫險則旁鑿以開車道運數十里西倉受之度宜徐運抵太原倉趨河入渭更無留阻可減費鉅萬天子然其計拜黃門侍郎同中書門下平章事充轉運使於是置河陰集津三門倉引天下租繇盟津沂洛而西三年積七百萬石省運費三十萬緡或曰以此緡納於上足以明功答曰是謂以國財求寵其可乎救吏為和市費遷侍中

唐書裴耀卿傳

潤州丹陽縣開元二十二年刺史齊澣以州北隔江舟

行繞瓜步回遠六十里多風濤乃於京口埭下直趨渡

江二十里開伊婁河二十五里渡楊子立埭歲利百億

舟不漂溺

唐書地理志 舊唐書明皇本紀載其事在開元二十六年冬未知孰是丹陽縣今為江南鎮江府屬一統志伊婁河在鎮江府城南

成都府溫江縣有新源水開元二十三年長史章仇兼

瓊因蜀王秀故渠開通漕西山竹木

唐書地理志 溫江縣即今四川成都府屬

瀛州河間縣西南五里有長豐渠開元二十五年刺史

盧暉自東城平舒引滹沱河東入淇通漕溉田五百餘

頃

唐書地理志 河間縣今為直隸河間府附郭一統志長豐渠在任丘縣西北自河間府舊東城引滹沱水東流通漕溉田

齊澣遷潤州刺史潤州北界隔大江至瓜步尾紆滙六

十里船繞瓜步多為風濤所漂損澣乃移漕路於京口

塘下直渡江二十里又開伊婁河二十五里即達楊子

縣自是免漂損之災歲減脚錢數十萬數年復為汴州  
刺史淮汴水運路自虹縣至臨淮一百五十里水流迅  
急舊用牛曳竹索上下流急難制乃奏自虹縣下開河  
三十餘里入於清河百餘里出清水又開河至淮陰縣  
北岸入淮免淮流湍險之害久之新河水復迅急又多  
僵石漕運艱澀行旅弊之漕因高力士中助連為兩道  
採訪使遂興開漕之利以中人主意復勾剝貨財賂遺  
中貴物議薄之舊唐書齊濟傳宿州虹縣廣濟新渠開元二十七  
年採訪使齊濟開自虹至淮陰北十八里入淮以便漕  
運既成湍急不可行遂廢唐書地理志本紀略同虹縣今為鳳陽府屬虹縣志康熙十一年知縣龔起暉詳開河  
北從陸家溝至洋河南由界溝至淮河南北交通南來糧艘由高郵洪澤至泗州上五河界溝至虹縣又由虹至陸家溝出白洋河入駱馬湖北回糧艘由駱

馬湖至虹縣出高郵亦然為漕運之間道然虹縣開河不專恃陸家溝一道今年水漲河形悉見一道由渭橋入長直溝竟達五河一道由渭橋入長直溝橫入汴河出城東至青洋達泗州此四道皆可開唯渭橋近徐溪口接靈壁孟山諸湖可引以資漕閘若陸家溝至秦橋水勢直瀉一決百里無涓滴之蓄恐不足以資漕輓也據此則虹之運道開之可以永利

魏州貴鄉縣有西渠開元二十八年刺史盧暉徙永濟渠自石灰窠引流至城西注魏橋以通江淮之貨唐書地理志

明皇本紀亦載之在是年九月貴鄉縣今為直隸大名府元城縣一統志永濟渠在臨河廢縣西北三十里自濬縣入界東北入內黃縣臨河廢縣在開州西六十里本漢黎陽縣地

平州馬城縣古海陽城也開元二十八年置以通水運唐書地理志馬城廢縣在今直隸永平府灤州城南二十里海陽城在府城南三十里

唐明皇開元二十九年陝郡太守李齊物鑿三門山以通運關三門巔踰巖之險地俾負索引艦昇於安流自

齊物始也舊唐書食貨志是年陝郡太守李齊物鑿底柱為門以

通漕開其山巔為輓路燒石沃醢而鑿之然棄石入河

激水益湍怒舟不能入新門候其水漲以人輓舟而上

天子疑之遣宦者按視齊物厚賂使者還言便齊物入

為鴻臚卿以長安令韋堅代之新唐書食貨志齊物鑿山巔棄石於河致水激舟難入門功不成矣幸

乘水漲行賄言便入為鴻臚二人欺君之罪大矣哉是年暴水伊洛及支川皆溢損居人

皆多漂沒舊唐書五行志

唐明皇天寶元年春正月甲寅陝郡太守李齊物先鑿

三門辛未渠成放流舊唐書明皇本紀陝州平陸縣天寶元年太守

李齊物開三門以利漕運唐書地理志齊物行賄粉飾食貨志既明著之地理志復言其利則激水湍怒之處至

元年始克成之平陸縣今山西平陽府屬是年命陝郡太守韋堅引澇水開廣運潭

於望春亭之東以通河渭京兆尹韓朝宗又分渭水入

自金光門置潭於西市之兩衙以貯材木舊唐書明皇本紀

唐明皇天寶二年三月壬子韋堅開廣濟潭畢功盛陳

舟艦舊唐書明皇本紀

華州華陰縣有漕渠自苑西引渭水因石渠會灞澇經

廣運潭至縣入魏天寶三載韋堅開唐書地理志

韋堅萬年人天寶元年為陝郡太守水陸轉運使自西

漢及隋有運渠自關門西抵長安以通山東租賦奏請

於咸陽擁渭水作輿成堰截灞澇水傍渭東注至關西

永豐倉下與渭合於長安城東九里長樂坡下澇水之

行水金鑑卷九十三  
六  
上架苑牆東面有望春樓樓下穿廣運潭以通舟楫二  
年而成舊唐書  
韋堅傳堅始鑿潭多壞民家墓起江淮至長安公  
私騷然及得罪林甫遣使江淮鈎索堅罪捕治舟夫漕  
史所在獄皆滿郡縣剝斂償輸責及鄰伍多裸死牢戶  
林甫死乃止新唐書韋堅傳

韋堅

為陝郡  
太守

兼水陸運使治漢隋運渠起關門抵長安通

山東租賦乃絕灞澹並渭而東至永豐倉與渭合又與  
長樂坡瀕苑牆鑿潭於望春樓下以聚漕舟堅因使諸  
舟各揚其郡名陳其土地所產寶貨諸奇物於楸上先  
時民間唱俚歌曰得體紇那邪其後得寶符於桃林於  
是陝縣尉崔成甫更得體歌為得寶弘農野堅命舟人

為吳楚服大笠廣袖芒屨以歌之成甫又廣之為歌辭  
十闕自衣闕後綠衣錦半臂紅抹額立第一船為號頭  
以唱集兩縣婦女百餘人鮮服靚妝鳴鼓吹笛以和之  
眾艘以次輳樓下天子望見大悅賜其潭名曰廣運潭  
是歲漕山東粟四百萬石自裴耀卿言漕事進用者常  
兼轉運之職而韋堅為最初耀卿與漕路請罷陸運而  
不果廢自景雲中陸運北路分八遞催民車牛以載開  
元初河南尹李傑為水陸運使運米歲二百五十萬石  
而八遞用車千八百乘耀卿罷久之河南尹裴迥以八  
遞傷牛乃為交場兩遞濱水處為宿場分官總之自龍  
門東山抵天津橋為石堰以遏水其後大盜起而天下

匱矣

唐書食貨志

天寶中上以三河道險東漕運艱難乃旁北山鑿石為月河以避湍急名曰天寶河歲省運夫五十萬又無覆溺淹滯之患天下稱之其河東西經直長五里餘闊四五丈深三四丈皆鑿堅石匠人於石得古鐵鏟長三尺餘上有平陸二字皆篆文也上異之藏於內庫遂命改河北縣為平陸縣旌其事也

傳信錄

唐肅宗末年史朝義兵分出宋州淮運於是阻絕租庸鹽鐵沂漢江而上河南尹劉晏為戶部侍郎兼勾當度支轉運鹽鐵鑄錢使江淮粟帛絲襄漢越商於以輸京師及代宗出陝州關中空窘於是盛轉輸以給用廣德

一年廢勾當度支使以劉晏顓領東都河南淮西江南東西轉運租庸鑄錢鹽鐵轉輸至上都度支所領諸道租庸觀察使凡漕事亦皆決於晏晏即鹽利顧備分吏督之隨江汴河渭所宜故時轉運船繇潤州陸運至揚子斗米費錢十九晏命囊米而載以舟減錢十五繇揚州距河陰斗米費錢百二十晏為歇艍支江船二千艘每船受千斛十船為綱每綱三百人篙工五十自揚州遣將部送至河陰上三門號上門填闕船米斗減錢九十調巴蜀襄漢麻枲竹篠為絢挽舟以朽索腐材代薪物無棄者未十年人人習河險注船不入汴汴船不入河河船不入渭江南之運積揚州汴河之運積河陰河

船之運積渭口渭船之運入太倉歲轉粟百一十萬石  
無升斗溺者輕貨自楊子至汴州每駝費錢二千二百  
減九百歲省十餘萬緡又分官吏主丹陽湖禁引漑自  
是河漕不涸

唐書食貨志

唐代宗廣德二年三月己未第五琦開決汴河

舊唐書代宗

本紀

唐代宗永泰二年九月庚申京兆尹黎幹以京城薪炭  
不給奏開漕渠自南山谷口入京城至薦福寺東街北  
抵景風延喜門入苑闊八尺深一丈渠成是日上幸安  
福門以觀之

舊唐書代宗本紀 新唐書載其事在大曆元年

唐代宗大曆八年以關內豐穰減漕十萬石度支和糴

以優農晏自天寶末掌出納監歲運知左右藏主財穀  
三十餘年矣及楊炎為相

時建中二年

以舊惡罷晏轉運使復

歸度支凡江淮漕米以庫部郎中崔河圖主之及田悅  
李惟岳李納梁崇義拒命舉天下兵討之諸軍仰給京  
師而李納田悅兵守渦口梁崇義搃襄鄧南北漕引皆  
絕京師大恐

唐書食貨志

劉晏領東都河南江淮轉運租庸鹽鐵常平使時大兵  
後京師米斗千錢禁膳不兼時甸農按穗以輸晏乃自  
按行浮淮泗達於汴入於河右循砥柱硤石觀三門遺  
迹至河陰鞏洛見宇文愷梁公堰廝河為通濟渠視李  
傑新隄盡得其病利然畏為人牽制乃移書於宰相元

載以為大抵運之利與害各有四京師三輔苦稅入之  
重淮湖粟至可減徭賦半為一利東都彫破百戶無一  
存若漕路流通則聚落邑廛漸可還定為二利諸將有  
不廷戎虜有侵盜聞我貢輸錯入軍食豐衍可以震耀  
夷夏為三利若舟車既通百貨雜集航海梯嶠可追貞  
觀永徽之盛為四利起宜陽熊耳虎牢成臯五百里見  
戶纔千餘居無尺椽爨無盛煙獸游鬼哭而使轉車輓  
漕功且難就為一病河汴自寇難以來不復穿治崩岸  
減木所在廡淤涉泗千里如周水行舟為二病東垣底  
柱澠池北河之間六百里戎邏久絕奪攘姦宄夾河為  
藪為三病淮陰去蒲坂亘三千里屯壁相望中軍皆鼎

司元侯每言衣無續食半菽輓漕所至輒留以饋軍非  
單車使者折簡書所能制為四病載方內擅朝權既得  
書即盡以漕事委晏故晏得盡其才歲輸始至天子大  
悅遣衛士以鼓吹迓東渭橋馳使勞曰卿朕鄼侯也凡  
歲至四十萬斛自是關中雖水旱物不翔貴矣

唐書劉晏傳  
晏字士安

南華  
人

唐德宗建中初宰相楊炎用事惡晏乃奪其權其年三  
月以金部郎中杜佑權勾當江淮水陸轉運使舊唐書  
食貨志杜  
佑以秦漢運路出浚儀十里入琵琶溝絕蔡河至陳州  
而合自隋鑿汴河官漕不通若導流培岸功用甚寡疏  
雞鳴岡首尾可以通舟陸行纔四十里則江湖黔中嶺



南蜀漢之粟可方舟而下。繇白沙趣東關，歷潁蔡涉汴，抵東都，無濁河沂淮之阻，減故道二千餘里。會李納將李洧以徐州歸，命淮路通而止。戶部侍郎趙贊又以錢貨出淮，迂緩分置汴州東西水陸運兩稅。鹽鐵使以度支總大綱，貞元初關輔宿兵米斗千錢，太倉供天子六宮之膳，不及十日禁中不能釀酒，以飛龍駝負永豐倉米給禁軍。陸運牛死殆盡，德宗以給事中崔造敢言爲能立事，用爲相，造以江吳素嫉錢穀諸使，顯利罔土，乃奏諸道觀察使刺史，選官部送兩稅至京師，廢諸道水陸轉運使。及度支巡院江淮轉運使，以度支鹽鐵歸尚書省，宰相分判六尚書事，以戶部侍郎元琇判諸道鹽

鐵權酒侍郎吉中孚判度支諸道兩稅，增江淮之運。浙江東西歲運米七十五萬石，復以兩稅易米百萬石。江西湖南鄂岳福建嶺南米亦百二十萬石，詔浙江東西節度使韓滉淮南節度使杜亞運至東西渭橋倉諸道有鹽鐵處，復置巡院。歲終宰相計課最，崔造厚元琇而韓滉方領轉運，奏國漕不可改，帝亦雅器滉，復以爲江淮轉運使。元琇嫉其剛，不可共事，因有隙。琇稱疾罷而滉爲度支諸道鹽鐵轉運使。於是崔造亦罷，滉遂劾琇常餽米淄青河中，而李納懷光倚以構叛，貶琇雷州司戶參軍，尋賜死。是時汴宋節度使春夏遣官監汴水，察盜灌溉者，歲漕經底，柱覆者幾半，河中有山號米堆運。

舟入三門僱平陸人為門匠執標指麾一舟百日乃能  
上諺曰古無門匠墓謂皆溺死也陝號觀察使李泌益  
鑿集津倉山西逕為運道屬於三門倉治上路以回空  
車費錢五萬緡下路減半又為入渭船方五板輸東渭  
橋太倉米至凡百三十萬石遂罷南路陸運

唐書食貨志

李泌貞元元年拜陝號觀察使始鑿山開車道至三門  
以便饟漕以勞進檢校禮部尚書

唐書李泌傳 日知錄通鑑唐德宗貞元二年李泌奏自集津

至三門鑿山門車道十八里以避砥柱之險按舊唐書李泌傳並無此事而食貨志曰開元二十二年八月明皇從京兆尹裴耀卿之言置河陰縣及河陰倉河清縣柏崖倉三門東集津倉三門西鹽倉開三門北山十八里以避湍險自江津而沂鴻溝悉納河陰倉自河陰送納含嘉倉又送納太原倉謂之北運自太原倉浮於渭以實京師凡三年運七百萬石省陸運之備四十萬貫又曰開元二十九年陝郡太守李齊物鑿三門山以通運關三門巔踰岩險之地俾負索引艦昇於安流自齊物始也天寶三載韋堅代蕭良以漕水作廣運潭於望春樓之東而藏舟焉是則北運始於耀卿尚陸行十八里河運始於齊物則直

達於長安也下距貞元四十五年無緣有李泌復鑿三門之事予按舊唐書泌傳固無此事而新唐書傳及食貨志則有之但通鑑以鑿山開車道訛為鑿三門車道則考訂之不慎

揚州江都縣有愛敬坡水門貞元四年節度使杜亞自

江都西循蜀岡之右引陂趨城隅以通漕漑夾陂田

唐書地理志

亞拜淮西節度使治漕渠引湖陂築防庸入之渠中

以通大舟夾隄高印田因得灌溉疏啓道衢徹壅通堙

人皆悅賴

唐書杜亞傳一統志愛敬陂在江都縣西五十里南比儀真縣漢廣陵太守陳登浚塘築陂百姓愛之因名亦名陳公塘上有石磨鐵

碾

行水金鑑

運河水

卷第九十四

唐德宗貞元八年詔東南兩稅財賦自河南江淮嶺南東道至於渭橋以戶部侍郎張滂主之河東劔南山南西道以戶部尚書度支使班宏主之舊唐書食貨志諸道鹽鐵轉運使張滂復置江淮巡院及浙西觀察使李錡領使江淮堰埭隸浙西者增私路小堰之稅以副使潘孟陽王上都留後李異為諸道轉運鹽鐵使以堰埭歸鹽鐵使罷其增置者自劉晏後江淮米至渭橋寢減矣至異乃復如晏之多新唐書食貨志

唐順宗即位以杜祐判鹽鐵轉運使理於揚州元和二

年三月以李巽代之先是李錡判使天下榷酤漕運由其操割而國用日耗巽既為使大正其事舊制每歲運江淮米五十萬斛至河陰留十萬四十萬送渭倉劉晏歿久不登其數唯巽秉使三載無升斗之闕焉巽卒以河東節度使李鄜代之

舊唐書食貨志

李吉甫為淮南節度使居三歲築富人固本二塘溉田且萬頃漕渠庫下不能居水乃築隄闕以防不足洩有

餘名曰平津堰

唐書李吉甫傳吉甫節度淮南在元和三年見宰相表平津堰在高郵州境見一統志

唐憲宗元和五年李鄜為淮南節度使以宣州觀察使盧坦代之

舊唐書食貨志

初揚州疏太子港陳登塘凡三十四陂

以益漕河輒復堙塞淮南節度使杜亞乃濬渠蜀岡疏

句城湖愛敬陂起隄貫城以通大舟河益庫水下走淮夏則舟不得前節度使李吉甫築平津堰以洩有餘防不足漕流遂通然漕益少江淮米至渭橋者纔二十萬斛諸道鹽鐵轉運使盧坦糴以備一歲之費省冗職八十員自江以南補署皆專屬院監而漕米亡耗於路頗多刑部侍郎王播代坦建議米至渭橋五百石亡五千石死其後判度支皇甫鎛議萬斛亡三百斛者償之千七百斛者流塞下過者死盜十斛者流三十斛者死而覆船敗輓至者不得十之四五部吏舟人相挾為姦榜笞號苦之聲聞於道路禁錮連歲赦下而獄死者不可勝數其後貸死刑流天德五城人不畏法運米至者

十七七八鹽鐵轉運使柳公綽請如王播議加重刑唐書

食貨志 公綽領鹽鐵轉運在元和末年長慶元年復為京兆尹

孟簡字幾道平昌人為常州刺史元和八年就加金紫

到郡開古孟瀆長四十一里灌溉沃壤四千餘頃為廉

使舉其課績是有就加之命是歲徵拜為給事中舊唐書孟簡傳

常州武進縣有孟瀆引江水南注通漕溉田四千頃元

和八年刺史孟簡因故渠開無錫縣有秦伯瀆東連蠡

湖亦元和八年孟簡所開唐書地理志一統志孟瀆在常州府城西二十八里南通運河北接呂莊入大江秦伯

瀆在無錫縣東南五里西枕運河東連蠡湖

越州山陰縣北五里有新河西北十里有運道塘皆元

和十年觀察使孟簡開唐書地理志山陰縣今屬浙江紹興府

唐憲宗元和十一年十二月甲寅初置淮潁水運使運

楊子院米自淮陰沂流至壽州四百里入潁口又沂流

至潁州沈止界五百里至於項城又沂流五百里入澗

河又三百里輸於鄆城得米五十萬石芟一千五百萬

束省汴運七萬六千貫舊唐書憲宗本紀

興州長舉縣元和中節度使嚴礪自縣而西疏嘉陵江

三百里焚巨石沃醢以碎之通漕以饋戍州戍兵唐書地理志

長舉廢縣在今陝西漢中府沔縣西一百里

王播復領鹽鐵轉運使時揚州城內官河水淺遇旱即

滯漕船乃奏自城南閘門西七里港開河向東屈曲取

禪智寺橋通舊官河開鑿稍深舟航易濟所開長一十

九里其工役料度不破省錢當使方圓自備而漕運不阻後政賴之文宗即位就加檢校司徒舊唐書王播傳揚州江都縣寶曆二年漕渠淺輸不及期鹽鐵使王播自七里港引渠東注官河以便漕運唐書地理志

唐文宗太和初歲旱河涸掬沙而進米多耗抵死甚衆不待覆奏秦漢時故漕興成堰東達永豐倉咸陽縣令韓遼請疏之自咸陽抵潼關三百里可以罷車輓之勞宰相李固言以為非時文宗曰苟利於人陰陽拘忌非朕所顧也議遂決堰成罷輓車之牛以供農耕關中賴其利故事州縣官充綱送輕貨四萬書上考開成初為長定綱州擇清彊官送兩稅至十萬選一官往來十年

者授縣令江淮錢積河陰轉輸歲費十七萬餘緡行綱多以盜抵死判度支王彥威置縣遞羣畜萬三千三百乘使路傍民養以取傭日役一驛省費甚博而宰相亦以長定綱命官不以材江淮大州歲授官者十餘人乃罷長定綱送五萬者書上考七萬者減一選五十萬減三選而已新唐書食貨志

李石隴西人開成元年領鹽鐵轉運使奏咸陽令韓遼請開興成渠舊漕在咸陽縣西十八里東達永豐倉自秦漢以來疏鑿其後堙廢昨遼計度用功不多此漕若成自咸陽抵潼關三百里內無車輓之勤則轅下牛盡得歸耕永利秦中矣李固言曰王涯已前已曾陳奏實

秦中之利但恐徵役今非其時上曰莫有陰陽拘忌否  
苟利於人朕無所慮也

舊唐書李石傳

華州華陰縣有敷水渠開成二年姜師度鑿以洩水害

五年刺史樊忱復鑿之使通渭漕

唐書地理志

唐文宗開成二年夏揚州運河竭

唐書文宗本紀

唐宣宗大中五年二月以戶部侍郎裴休為鹽鐵轉運  
使明年八月以本官平章事依前判使始者漕米歲四  
十萬斛其後至渭倉者十不三四漕吏狡蠹敗溺百端  
官舟之沉多者歲至七十餘隻緣河姦犯大紊晏法休  
使寮屬按之委河次縣令董之自江津達渭以四十萬  
斛之備計緡二十八萬悉使歸諸漕吏巡院胥吏無得

侵牟舉之為法凡十事奏之帝大悅詔曰裴休興利除

害深見奉公盡可其奏由是三歲漕米至渭濱積一百

二十萬斛無升合沉棄焉

舊唐書食貨志

戶部侍郎裴休為使以

瀕河縣令董漕事自江達渭運米四十萬石居三歲米

至渭橋百二十萬石凡漕達於京師而足國用者大略

如此其他州縣方鎮漕以自資或兵所征行轉運以給

一時之用者皆不足紀

新唐書食貨志

桂州理定縣西十里有靈渠引灘水故秦史祿所鑿後

廢寶曆初觀察使李渤立斗門十八以通漕俄又廢咸

通九年刺史魚孟威以石為鑿隄亘四十里植大木為

斗門至十八里乃通巨舟

唐書地理志

蒼葢云理定縣明省入廣西永福縣今因之一統志靈渠在興安縣北其

源即離水昔秦始皇南戍五嶺命史祿鑿渠以通舟楫漢馬援南征餉道亦出於此唐觀察使李渤立斗門以通漕刺史魚孟威以石為隄乃通巨舟宋提刑李師中亦嘗修浚洪武末渠道湮壞遣御史嚴震直重修吾鄉嚴尚書震直奉命廣西理鹽法桂林屬邑興安有靈渠匯湘離二江之水而分導焉南自蒼梧注於海北自靈川入於洞庭渠以埒名者三十有六隄防善圯屢至湮塞比至名縣屬審地勢鳩工用計浚源疏流循其故道延袤五十餘里架梁鑿竇濟行旅溉耕隴功訖以聞上喜謂廷臣曰老巖成此巨功予備述其事入於郡志

唐同光二年二月辛巳詔蔡州刺史朱勅浚索水通

漕運

水經注車關水出於嵩洛之山發於層阜之上源兩枝分流瀉注世謂之石泉水東流為索水西注為車關水索水在成阜北 通鑑

唐長興四年二月三司使奏洛河水運自洛口至京往來牽船下卸皆是水運牙官每人管定四十石今洛岸至倉門稍遠牙官轉運艱難近日例多逃走今欲於洛河北岸別鑿一灣引船直至倉門下卸從之

五代史補

晉天福三年冬十月戊寅帝以大梁舟車所會便於

漕運建東京於汴州

自此歷漢周至宋皆都於汴梁建東都於汴州以汴州為開封府 通鑑

後漢乾祐二年右補闕盧振上言臣伏見汴河隄兩岸隄堰不牢每年潰決正當農時勞民功役以臣愚管沿汴水有故河道陂澤處置立斗門水漲溢時以分其勢即澇歲無漂沒之患早年獲澆溉之饒庶幾編氓差免勞役

五代史補

周顯德二年十一月乙未汴水自唐末潰決繇埭壩橋東南悉為污澤上謀擊唐先命武寧節度使武行德發民夫因故隄疏導之東至泗上議者皆以為難成上曰數年之後必獲其利

謂淮南既平藉以通漕將獲其利也 通鑑



周世宗顯德四年四月乙酉詔疏汴水北入五丈河自河

都城歷曹濟及鄆其廣五丈舊名五丈河宋開寶六年詔改名廣濟河薛史曰浚五丈河東流於定陶入於濟以通齊魯運路由是齊魯舟

楫皆達於大梁五代史

周顯德五年春正月己丑上欲引戰艦自淮入江阻

北神堰不得度北神堰在楚州城北五里吳王夫差溝通江淮後人以

此立堰者以淮水低溝水高防其洩也舟行度堰入淮遣使行

視還言地形不便計功甚多上自往視之授以規畫

發楚州民夫浚之旬日而成用功甚省巨艦數百艘

皆達於江唐人大驚以為神 三月浚汴口導河流

達於淮於是江淮舟楫始通此即唐時運路也自江淮割據運漕不通水路湮塞今復浚之通鑑

周顯德六年春世宗遣朴行視汴口作斗門五代史王朴傳

是年二月丙子朔命王朴如河陰按行河隄立斗門

於汴口壬午命侍衛都指揮使韓通宣徽南院使吳

廷祚當作廷祚發徐宿宋單等州丁夫數萬浚汴水甲申命

馬軍都指揮使韓令坤自大梁城東導汴水入於蔡

水魏收地形志曰汴水在大梁城東分為蔡渠九域志曰浚儀縣之琵琶溝即蔡河也三朝會要曰惠民河與蔡河一水即閔河也建隆元年始命陳承昭

督丁夫導閔河自新鄭與蔡水合貫京師南歷陳潁達壽春以通淮右舟楫相繼商賈畢至都下利之於是以西南為閔河東南為蔡河至開寶六年始改閔

河為惠民河以通陳潁之漕命步軍都指揮使袁彥浚五丈

渠東過曹濮梁山泊以通青鄆之漕發畿內及滑亳

丁夫數千以供其役通鑑

周顯德間渡汴口之渠道河水達於淮水以通江淮

之漕又自大梁城東導汴水入於蔡水以通陳潁之

漕又於都城之東浚汴水為五丈渠東過曹濟梁山  
樂以通齊魯之漕此皆宋之漕運所由始也筆壘

世宗開御河本為薊燕漕運計御河其不可廢也聞

見近錄

吳越自唐末有國而楊行密李昇據有江淮吳越貢賦

朝廷遣使皆由登萊泛海歲常飄溺五代史吳越世家

楊行密據有江淮審知歲貢使汎海自登萊朝貢於梁

使者入海覆溺歲常十三四五代史閩世家 胡三省通鑑音注曰 福建入貢大梁陸行當自衢信取饒池

界度江取舒盧壽度淮而後入梁境然自信饒至盧壽皆屬楊氏而朱楊為世仇不可得而段道故航海入貢今自福州洋過温州洋取台州洋過天門山入

明州象山洋過澇江掠冽港直東北度大洋抵登萊岸風濤至險故沉溺者衆

王溥字齊物祁人周顯德初為華州刺史未幾改鎮潁

州州境舊有通商渠距淮三百里歲久湮塞溥疏導之

遂通舟楫郡無水患歷鄭州團練使陞宿州防禦課民

鑿井築城北隄以禦水災宋史王溥傳

周顯德六年春詔通河北按行河隄因發徐宿宋單等

州民浚汴渠數百里宋史韓通傳韓令坤武安人周世宗入揚

州命權知軍府六年春命以汴亳民導汴水入於蔡宋史

韓令坤傳

宋太祖即位仁朗從討李重進還與右神武統軍陳承

昭浚五丈河以通漕宋史田仁朗傳劉載字德輿范陽人宋初浚

五丈河自陳橋達曹州之西境命載護其役建隆四年

權知貝州宋史劉載傳

宋太祖建隆二年正月丁巳導蔡水入潁 二月壬申  
疏五丈河 甲戌幸城南觀修水匱 宋史太祖本紀  
漕運宋都大梁有四河以通漕運曰汴河曰黃河曰惠  
民河曰廣濟河而汴河所漕為多建隆以來首浚三河  
令自今諸州歲受稅租及筦榷貨利上供物帛悉官給  
舟車輸送京師毋役民妨農 汴河自隋大業初疏通  
濟渠引黃河通淮至唐改名廣濟宋都大梁以孟州河  
陰縣南為汴首受黃河之口屬於淮泗每歲自春及冬  
常於河口均調水勢止深六尺以通行重載為準歲漕  
江淮湖浙米數百萬及至東南之產百物衆寶不可勝  
計又下西山之薪炭以輸京師之粟以振河北之急內

外仰給焉故於諸水莫此為重其淺深有度置官以司  
之都水監總察之然太河向背不常故河口歲易易則  
度地形相水勢為口以逆之遇春首輒調數州之民勞  
費不貲役者多溺死吏又並緣侵漁而京師常有決溢  
之虞太祖建隆二年春導索水自旃然與須水合入於  
汴三年十月詔緣汴河州縣長吏常於春首課民夾岸  
植榆柳以固隄防 宋史河渠志

汴渠派分洪河自唐迄今皆以為莫太之利然迹其  
事實抑有深害何哉凡梁宋之地畎澮之利湊流此  
渠以成其大至隋煬帝將幸江都遂析黃河之流築  
左右隄三百餘里舊所湊水悉為橫絕散漫無所故

宋亳之地遂成沮洳卑濕且昔之安流今乃湍悍覆舟之患十有三昔之漕運冬夏無限今則春開秋閉歲中漕運止得半載昔之泝沿兩無艱阻今則逆流而上乃重載而行其為難也甚矣沿流而下即虛舟而往其為利也背矣矧自天子建都而汴水貫都東下每歲霖澍決溢為慮由斯觀之其利安在然歷世浸遠詎可卒圖異日明哲之士開悟積惑言復曩迹始信茲言之不謬

丁晉公談錄

蔡河貫京師為都人所仰兼閔水洧水潁水以通舟閔水自尉氏歷祥符開封合於蔡是為惠民河洧水自許田注鄆陵東南歷扶溝合於蔡潁水出鄭之犬隗山注

臨潁歷鄆陵扶溝合於蔡凡許鄭諸水令堅白鴈丈八溝京索令西河褚河湖河雙河欒霸河皆會焉猶以其淺涸故植木橫棧棧為水之節啓閉以時建隆二年四月命中使浚蔡河設斗門節水自京距通許鎮三年詔發畿甸陳許丁夫數萬浚蔡水南入潁川 廣濟河道河水自開封歷陳留曹濟鄆其廣五丈歲漕上供米六十二萬石太祖建隆二年正月遣使往定陶規度發曹單丁夫數萬浚之三月幸新水門觀放水入河先是五丈河泥淤不利行舟遂詔左監門衛將軍陳承昭於京城之西夾汴水造斗門引京索蔡河水通城濠入斗門俾架流汴水之上東進於五丈河以便東北漕運公私

咸利三年正月遣右龍武統軍陳承昭護修五丈河造西水磴洛水貫西京多暴漲漂壞橋梁建隆二年留守向拱重修天津橋成甃巨石為脚高數丈銳其前以疏水勢石縱縫以鐵鼓絡之其制甚固四月具圖來上降詔褒美開寶九年郊祀西京詔發卒五千自洛城菜市橋鑿渠抵漕口三十五里饋運便之其後導以通汴金水河一名天源本京水導自滎陽黃堆山其源曰祝龍泉太祖建隆二年春命左領軍衛上將軍陳承昭率水工鑿渠引水過中牟名曰金水河凡百餘里抵都城西架其水橫絕於汴設斗門入浚溝通城濠東匯於五丈河公私利焉乾德三年又引貫皇城歷後苑內庭

池治水皆至焉開寶九年帝步自左掖按地勢命水工

引金水由承天門鑿渠為大輪激之南注晉王第宋史河渠志

睢陽當漕舟之路定陶乃東運之衝其後河截清水頗

涉艱阻宋史地理志是年宋州汴河溢宋史五行志陳承昭江表人宋

初入朝太祖以承昭習知水利督治惠民五丈二河以

通漕運都人利之建隆二年河成賜錢三十萬四年春

大發近甸丁壯數萬修畿內河隄命承昭董其役又令

督諸軍子弟數千鑿池朱明門外以習水戰宋史陳承昭傳

宋太祖乾德元年二月癸丑蕞濕水入京丁巳浚汴

河四月甲辰詔疏鑿三門宋史太祖本紀

宋太祖乾德三年二月令陳承昭率丁夫數千鑿渠自

長社引澗水至京師合閔水澗水本出密縣大隗山歷許田會春夏霖雨則泛溢民田至是渠成無水患閔河益通漕焉宋史河渠志四月癸亥募諸軍子弟募五丈河通皇城為池宋史太祖本紀

宋太祖乾德四年八月宿州汴水溢壞隄宋史五行志

李符字德昌內黃人乾德中遷起居郎建議鑿橫江河以通漕運發和州三縣丁壯給其役宋史李符傳

宋太祖開寶二年秋七月癸酉汴決下邑宋史太祖本紀

宋太祖開寶四年六月乙酉汴決穀熟七月癸亥汴

決宋城宋史太祖本紀六月汴水決宋州穀熟縣濟陽鎮宋史五行志

宋太祖開寶五年六月己丑汴決穀熟宋史太祖本紀六月汴水

決忠州宋史五行志

宋太祖開寶六年七月歷亭縣御河決宋史五行志

宋太祖開寶八年十二月庚子幸惠民河觀築堰宋史太祖本紀

祖本紀

開寶間議征江南詔用京西轉運使李符之策發和州丁夫及鄉兵凡數萬人鑿橫江渠於歷陽令符督其役渠成以通漕運而軍用無闕宋史河渠志

李懷忠范陽人改日騎左右廂都指揮使上幸西京愛其地形勢俾天下中正有留都之意懷忠乘間進曰東京有汴渠之漕歲致江淮米數百萬斛禁衛數十萬人仰給於此帑藏重兵皆在為根本安固已久一旦遽欲

遷徙臣實未見其利上嘉納之

宋史李懷忠傳

周瑩景城人歷事唐漢周習水利嘗浚汴口導鄭州郭西水入中牟渠修滑州河隄太宗潛邸瑩得給事左右即位補殿直歷西上閤門使與郝守濬護塞宋州決河歷知澶州卒贈侍中謚元惠

宋史周瑩傳

宋太宗太平興國二年六月開封府汴水溢壞大寧隄

浸害民田

宋史五行志

七月開封府言汴水溢壞開封大寧隄

浸民田害稼詔發懷孟丁夫三千五百人塞之

白河

在唐州南流入漢太平興國二年正月西京轉運使程能獻議請自南陽下向口置堰迴水入石塘沙河合蔡河達於京師以通湘潭之漕詔發唐鄧汝潁許蔡陳鄭

丁夫及諸州兵凡數萬人以弓箭庫使王文寶六宅使

李繼隆內作坊副使李神祐劉承珪等護其役塹山陘

谷歷博望羅渠少柘山凡百餘里月餘抵方城地勢高

水不能至能復請多役人以致水然不可通漕運會山

水暴漲石堰壞河不克就卒陞廢焉

宋史河渠志

九月汴水溢

宋史太宗本紀

李繼隆太平興國二年改六宅使嘗詔與王文寶

李神祐劉承珪同護浚京西河又與梁迥竇神寶治決

河迴體肥碩所乘舟弊不能濟繼隆易以已舟而繼隆

舟果覆棲枯桑杪賴他舟以度

宋史李繼隆傳

是年京西轉運使

程能議開新河自襄漢至京師引白河水注焉以通湘

潭之漕詔發唐鄧汝潁許蔡陳鄭丁夫數萬赴其役發

諸州兵萬人助之命文寶與六宅使李繼隆作坊副使李神祐劉承珪分往護作

宋史王文寶傳

宋太宗太平興國三年正月戊戌開襄漢漕渠渠成而水不上卒廢辛丑浚廣濟惠民及蔡三河乙巳浚

汴口

宋史太宗本紀

是年正月命發近縣丁夫浚廣濟河發軍

士千人浚汴口

六月宋州言寧陵縣河溢隄決詔發

宋毫丁夫四千五百人分遣使臣護役

宋史河渠志

五月汴水

決宋州寧陵縣境六月泗州汴水又漲一文塞州北門

宋史五行志

梁迥以平江南功領順州團練使太平興國三年

夏汴水大決詔迥發畿內丁男三千護塞汴口

宋史梁迥傳

宋太宗太平興國四年河又決於宋城縣以本州諸縣

人夫三千五百人塞之

宋史河渠志

史珪太平興國四年為右

衛將軍領平州刺史督浚惠民河自尉氏達京九十里

數旬而畢民咸便之

宋史史珪傳

曹翰大名人太平興國五年為幽州行營都部署詔督

役開南河自雄莫以通漕運議築大隄以捍之

宋史曹翰傳

先是四河所運未有定制太平興國六年汴河歲運江

淮米三百萬石菽一百萬石黃河粟五十萬石菽三十

萬石惠民河粟四十萬石菽二十萬石廣濟河粟十二

萬石凡五百五十萬石非水旱蠲放民租未嘗不及其

數至道初汴河運米五百八十萬石大中祥符初至七

百萬石江南淮南兩浙荆湖路租糴於真揚楚泗州置



倉受納分調舟船汴流入汴以達京師置發運使領之  
 諸州泉帛雜物軍器上供亦如之陝西諸州菽粟自黃  
 河三門沿流入汴以達京師亦置發運司領之粟帛自  
 廣濟河而至京師者京東之十七州由石塘惠民河而  
 至京師者陳潁許蔡光壽六州皆有京朝官廷臣督之  
 河北衛州東北有御河達乾寧軍其運物亦廷臣主之  
 廣南金銀香藥犀象百貨陸運至虔州而後水運川益  
 諸州金帛及租市之布自劔門列傳置分輦負擔至嘉  
 州水運達荆南自荆南遣綱吏送京師宋史食貨志河北諸水  
 有通轉向者有為方田限遼人者太宗太平興國六年  
 正月遣八作使郝守濬分行河道抵於遼境者皆疏導

之又於清苑界開徐河雞距河五十里入白河自是關  
 南之漕悉通濟焉宋史河渠志

宋太宗太平興國七年秋七月易水溢宋史太宗本紀七月大名  
 府御河漲壞濟口 京兆府咸陽渭水漲壞浮梁工人  
 溺死者五十四人宋史五行志

卷第九十四



宋雄幽州人雍熙中知均唐二州未幾護河陰屯兵以知河渠利害因命領護汴口均節水勢以達轉漕京師

賴之

宋史宋雄傳

初楚州北山陽灣尤迅急多有沉溺之患雍熙中轉運使劉蟠議開沙河以避淮水之險未完而受代喬維岳繼之開河自楚州至淮陰凡六十里舟行便之

宋史河渠志

喬維岳為淮南轉運司淮河西流三十里曰山陽灣水勢湍悍運舟多懼覆溺維岳規度開故沙河自末口至淮陰磨盤口凡四十里又建安北至淮滙五堰運舟所至十經上下其重載者皆卸糧而過舟時壞失糧綱率緣此為姦潛有侵盜維岳始命剏二斗門於西河第三

堰二門相距踰五十步覆以夏屋設縣門積水俟湖平乃泄之建橫橋岸上築土累石以牢其址自是弊盡革而運舟往來無滯矣罷使職權知楚州

宋史喬維岳傳

宋太宗端拱元年供奉官閻門祇候閻文遜苗忠俱上言開荆南城東漕河至師子口入漢江可通荆峽漕路至襄州又開古白河可通襄漢漕路至京詔八作使石全振往視之遂發丁夫治荆南漕河至漢江可勝二百斛重載行旅者頗便而古白河終不可開

宋史河渠志

孔守正浚儀人淳化初擢高陽關副都明年護浚惠民河塞澶州決河就知州軍

宋史孔守正傳

宋太宗淳化二年六月乙酉以汴水決浚儀縣帝親督

衛士塞之宋史太宗本紀是年六月汴水決浚儀縣帝乘步輦出乾元門宰相樞密迎謁帝曰東京養甲兵數十萬居人百萬家天下轉漕仰給在此一渠水朕安得不顧車駕入泥淖中行百餘步從臣震恐殿前都指揮使戴興叩頭懇請回馭遂捧輦出泥淖中詔興督步卒數千塞之日未盱水勢遂定帝始就次太官進膳親王近臣皆泥濘沾衣知縣宋炎亡匿不敢出特赦其罪是月汴又決於宋城縣發近縣丁夫二千人塞之是年從河北轉運使請自深州新若鎮開新河導胡盧河分為一派凡二百里抵常山以通漕運胡盧河源於西山始自冀州新河鎮入深州武強縣與滹沱河合流其後變徙入大河

至神宗熙寧中內侍程昉請開決引水入新河故道詔本路遣官按視永靜軍判官林伸東光縣令張言舉言新河地形高仰恐害民田昉言地勢最順宜無不便仍復遣劉璿李直躬考實而璿等卒如昉言伸等坐貶官四年春詔六宅使何承矩等督戍兵萬八千人自霸州界引滹沱水灌稻為屯田用實軍廩且為備禦焉初臨津令黃懋上封事盛稱水田之利乃以承矩泊內供奉官閻承翰殿直張從古同制置河北緣邊屯田事仍以懋為大理寺丞充屯田判官其所經畫悉如懋奏是年以汜水汎溢浸許州民田詔自長葛縣開小河導淇水分流二十里合于惠民河宋史河渠志

宋太宗淳化三年七月洛水溢

宋史太宗本紀

七月河南府洛水

漲壞七里鎮國二橋

宋史五行志

李繼宣浚儀人淳化三年知

保州又轉莊宅使築關城浚外濠造船二百艘入雞渠

泉河以運糧人咸便之

宋史李繼宣傳

宋太宗至道元年九月帝以汴河歲運江淮米五七百萬斛以濟京師問侍臣汴水疏鑿之由令叅知政事張洎講求其事以聞其言曰禹導河自積石至龍門南至華陰東至砥柱又東至于孟津東過洛汭至于大伾即今成臯是也或云黎陽山也禹以大河流泛中國為害最甚乃于貝止疏二渠以分水勢一渠自舞陽縣東引入漯水其水東北流至于乘縣入海即今黃河是也一

渠疏畎引傍西山以東北形高敞壞堤水勢不便流溢夾右碣石入于渤海書所謂北過降水至于大陸降水即濁漳大陸則邢州鉅鹿澤播為九河同為逆河入于海河自魏郡貴鄉縣界分為九道下至滄州今為一河言逆河者謂與河水往復相承受也齊桓公塞以廣田居惟一河存焉今其東界至莽枯河是也禹又於滎澤下分大河為陰溝引注東南以通淮泗至大梁浚儀縣西北復分為二渠一渠元經陽武縣中牟臺下為官渡水一渠始皇疏鑿以灌魏郡謂之鴻溝荻荍渠自滎陽五出池口來注之其鴻溝即出河之溝亦曰荻荍渠漢明帝時樂浪人王景謁者王吳始作浚儀渠蓋循河溝

故瀆也。渠成流注浚儀，故以浚儀縣為名。靈帝建寧四年，於敖城西北壘石為門，以遏渠口，故世謂之石門渠。外東合濟水，濟與河渠渾濤，東注至敖山北，渠水至此，又兼邲之水。即春秋晉楚戰於邲，邲又音汜，即汴字。古人避反字，改從汴字。渠水又東經滎陽北，旃然水自縣東流入汴水。鄭州滎陽縣西二十里三皇山，上有二廣武城，二城相去百餘步。汴水自兩城間小澗中東流而出，而濟流自茲乃絕。唯汴渠首受旃然水，謂之鴻渠。東晉太和中，桓溫北伐，前燕將通之，不果。義熙十三年，劉裕西征姚秦，復浚此渠，始有湍流奔注，而岸善潰，塞裕更疏鑿而漕運焉。隋煬帝大業三年，詔尚書左丞、相皇

甫誼發河南男女百萬，開汴水，起滎澤入淮千餘里，乃為通濟渠。又發淮南兵夫十餘萬，開邗溝，自山陽淮至于揚子江，三百餘里，水面闊四十步，而後行幸焉。自後天，下利于轉輸。昔孝文時，賈誼言：漢以江淮為奉地，謂魚鹽穀帛多出東南，至五鳳中，耿壽昌奏：故事歲增關東穀四百萬斛，以給京師，亦多自此渠漕運。唐初開通濟渠，為廣濟渠。開元中，黃門侍郎平章事裴耀卿言：江淮租船自長淮西北沂鴻溝，轉相輸納於河陰，含嘉太原等倉，凡三年運米七百萬石，實利涉於此。開元末，河南採訪使汴州刺史齊澣以江淮漕運經淮水波濤有沉損，遂浚廣濟渠，下流自泗州虹縣至楚州淮陰縣北。

八十里合于淮踰時畢功既而水流迅急行旅艱險尋乃廢停却由舊河德宗朝歲漕運江淮米四十萬石以益關中時叛將李正己田悅皆分軍守徐州臨渦口梁崇義阻兵襄鄧南北漕引皆絕于是水陸運使杜祐請改漕路自浚儀西十里疏其南涯引流入琵琶溝經蔡河至陳州合潁水是秦漢故道以官漕久不由此故填淤不通若畎流培岸則功用甚寡又廬壽之間有水道而平岡亘其中曰雞鳴山佑請疏其兩端皆可通舟其間登陸四十里而已則江湖黔嶺蜀漢之粟可方舟而下由是白沙趨東關經廬壽浮潁步蔡歷琵琶溝入汴河不復經沂淮之險徑於舊路二千里功寡利溥朝議

將行而徐州順命淮路乃通至國家膺圖受命以大梁四方所湊天下之樞可以臨制四海故卜京邑而定都天下甲卒數十萬衆戰馬數十萬匹並萃京師悉集七亡國之士民於輦下比漢唐京邑民庶十倍甸服時有水旱不至艱歉者有惠民金水五丈汴水等四渠派引脈分咸會天邑舳舻相接贍給公私所以無匱乏唯汴水橫亘中國首承大河漕引江湖利盡南海半天下之財賦并山澤之百貨悉由此路而進然則禹力疏鑿以分水勢煬帝開河以奉巡游雖數湮廢而通流不絕於百代之下終為國家之用者其上天之意乎

宋史河渠志

宋太宗至道二年三月內殿崇班閻光澤國子博士邢

用之上言請開白溝自京師抵彭城呂梁口凡六百里

以通長淮之漕詔發諸州丁夫數萬治之以光澤護其

役議者非之會宋州通判王矩上表極陳其不可且言

用之田園在襄邑歲苦水潦私幸渠成遂罷其役

宋史河渠志

六月河南瀍澗洛三水漲壞鎮國橋七月宋州汴河

決穀熟縣

宋史五行志

宋時漕運自荆湖南北米至真揚交卸舟人皆市私

鹽以歸每得厚利故舟人以船為家一有損漏旋即

補葺久而不壞運道亦通太宗嘗謂侍臣曰篙工柁

師有少販鬻但無妨公不必究問真帝王之度哉

路山

餘話

王嗣宗為江浙荆湖發運使初漕運經泗州浮橋舟多

覆壞嗣宗徙至城隅遂獲安濟咸平三年以漕運稱職

就拜太常少卿

宋史王嗣宗傳

宋真宗咸平四年知靜戎軍王能請自姜女廟東決鮑

河水北入閻臺淀又自靜戎之東引北注三臺小李村

其水溢入長城口而南又壅使北流而東入于雄州五

年順安軍兵馬都監馬濟復請自靜戎軍東擁鮑河開

渠入順安軍又自順安之西引入威虜軍置水陸營田

於渠側濟等言役成可以達糧漕隔遼騎帝許之獨鹽

臺淀稍高恐決引非便不從其議因詔莫州部署石普

并護其役踰年功畢帝曰普引軍壁馬村以西開鑿深



廣足以張大軍勢若邊城壕溝悉如此則遼人倉卒難

馳突而易追襲矣其年河北轉運使耿望開鎮州常山

鎮南河水入汶河至趙州有詔褒之宋史河渠志王能定陶人

咸平中知靜戎軍建議決鮑河斷長城口北注雄州塘

水為戎馬限方舟通漕以實塞下宋史王能傳

宋真宗咸平五年六月京師大雨漂壞廬舍民有壓死

者積潦浸道路自朱雀門東抵宣化門尤甚皆注惠民

河河復漲溢軍營宋史五行志七月乙巳疏丁岡河宋史真宗本紀七月

京師霖雨溝洫壅惠民河溢泛道路壞廬舍知開封府

寇準治丁岡古河泄導之宋史河渠志

宋真宗咸平六年邢用之為度支員外郎又令自襄邑

下流治白溝河導京師積水而民田無害宋史河渠志

楊日嚴改京東轉運使開清河八十里抵暖水河並隄

起倉廩以便漕運加直史館徙益州宋史楊日嚴傳

宗真宗景德元年正月壬子開定州河通漕宋史真宗本紀九月

宋州言汴河決浸民田壞廬舍遣使護塞踰月功就

是年夏北面都鈐轄閻承翰自嘉山東引唐河三十二

里至定州醜而為渠直蒲陰縣東六十二里會沙河徑

邊吳泊遂入于界河以達方舟之漕又引保州趙彬堰

徐河水入雞距泉以息挽州之役自是朔方之民灌溉

饒益大蒙其利矣八月詔滄州乾寧軍謹視斗門水口

壅潮水入御河東塘堰以廣溉廕四年五月知雄州李

允則決渠為水田帝以渠接界河罷之因下詔曰頃修國好聽其盟約不欲生事姑務息民自今邊城止可修葺城壕其餘河道不得輒有濬治大中祥符七年四月涇原都鈐轄曹瑋言渭北有古池連帶山麓今濬為渠令民導以溉田六月知永興軍陳堯咨導龍首渠入城民庶便之並詔嘉獎天禧末諸州屯田總四千二百餘頃而河北屯田歲收二萬九千四百餘石保州最多逾其半焉江淮兩浙承偽制皆有屯田克復後多賦與民輸租第存其名在河北者雖有其實而歲入無幾利在蓄水以限遼騎而已

宋史河渠志

宋真宗景德二年六月開封府言西京沿汴萬勝鎮先

置斗門以減河水今汴河分注濁水入廣濟河堙塞不利帝曰此斗門本李繼源所造屢詢利害以為始因京索河遇雨即汎流入汴遂置斗門以便通洩若遽壅塞復慮決溢因令多用巨石高置斗門水雖甚大而餘波亦可減去

宋史河渠志

宋真宗景德三年六月京城汴水暴漲詔覘候水勢并

工修補增起堤岸工畢復遣使致祭

宋史河渠志

七月應天府

汴水決南至亳州合浪宕渠東入於淮

宋史五行志

九月甲子

浚汴口

宋史真宗本紀

是年內侍趙守倫建議自京東分廣濟河

由定陶至徐州入清河以達江湖漕路役既成遣使覆視繪圖來上帝以地有隆阜而水勢極淺雖置堰埭又

歷呂梁灘磧之險非可漕運罷之 宋史河渠志

宋真宗景德四年六月鄭州索水漲高四丈許漂滎陽

縣居民有溺死者 宋史五行志

李溥河南人景德中任制置江淮等路並發運使高郵

軍新開湖水散漫多風濤溥令漕舟東下者還過泗州

因載石輸湖中積為長隄自是舟行無患 宋史李溥傳

謝德權提總京城四排岸領護汴河兼督輦運前是歲

役浚河夫三十萬人而主者因循隄防不固但挑沙擁

岸陟或河流泛濫即中流復填淤矣德權須以沙盡至

土為垠棄沙隄外遣三班使者分地以主其役又為大

錐以試築隄之虛實或引錐可入者即坐所轄官吏多

被譴免者植樹數十萬以固岸改崇儀副使 宋史謝德權傳

宋真宗大中祥符元年春正月甲戌大雪停汴口蔡河

夫役 宋史真宗本紀 六月開封府言尉氏縣惠民河決遣使督視

完塞 宋史河渠志

宋真宗大中祥符二年四月陳州言州地洿下苦積潦

歲有水患請自許州長葛縣浚減水河及補棗村舊河

以入蔡河從之八月汴水漲溢自京至鄭州浸道路詔

選使乘傳減汴口水勢既而水減阻滯漕運復遣浚汴

口 宋史河渠志 是年八月丙戌京東惠民河溢居民避水所過

津渡戒有司勿算九月甲子浚汴口 宋史真宗本紀 是年十月京

畿惠民河決壞民田 宋史五行志

宋真宗大中祥符四年八月大名府御河溢合流壞府城害田人多溺死

宋史五行志

宋真宗大中祥符五年八月庚戌淮南旱減運河水灌民田仍寬租限州縣不能存恤致民流亡者罪之

宋史真宗本紀

大哉王者之政仁恩普徧至今讀之猶令人雪涕

宋真宗大中祥符七年六月河南府洛水漲

宋史五行志

宋真宗大中祥符八年六月詔自今後汴水添漲及七尺五寸即遣禁兵三千沿河防護八月太常少卿馮元方請浚汴河中流闊五丈深五尺可省修堤之費即詔遣使計度修浚使還上言泗州西至開封府界岸開底平水勢薄不假開浚請止自泗州夾岡用功八十六萬

五千四百三十八以宿毫丁夫充計減工七百三十一萬仍請于沿河作頭踏道僻岸其淺處為鉅牙以束水勢使其後成河道止用河清下卸卒就未放春水前令逐州長吏令佐督役自今汴河淤澱可三五年一浚又於中牟滎澤縣各置開減水河並從之

宋史河渠志

宋真宗大中祥符九年知許州石普請于大流堰穿渠置二斗門引沙河以漕京師遣使按視四月詔遣中使至惠民河規畫置壩子以通舟運

宋史河渠志

宋真宗天禧元年九月甲寅詔能拯救汴渠覆溺者給賞或溺者貧者以官錢給之十二月壬辰遣使緣汴河收瘞流尸

宋史真宗本紀

宋真宗天禧二年八月乙卯詔畎索河水入金水河

宋史真宗

本紀是年江淮發運使賈宗言諸路歲漕自真陽入淮汴

歷堰者五糧載煩於剝卸民力罷於牽挽官私船艦由

此速壞今議開揚州古河繚城南接運渠毀龍舟新興

萊更三堰鑿近堰漕路以均水勢歲省官費十數萬功

利甚厚詔屯田郎中梁楚閣門祗候李居中按視以為

當然明年役既成而水注新河與二堰平漕船無阻公

私大便

宋史河渠志

宋真宗天禧三年六月癸未浚淮南漕渠廢三堰

宋史真宗本紀

薛奎字宿藝正平人為江淮制置發運使疏漕河廢三

堰以便餉運進吏部員外郎

宋史薛奎傳

是年十二月都官員

外郎鄭希甫言汴河兩岸皆是陂水廣浸民田隄脚並

無流泄之處今汴河南省自明河接澳入淮望詔轉運

使規度以聞

宋史河渠志

宋真宗天禧四年正月丙寅開揚州運河

宋史真宗本紀

王臻擢淮南轉運副使時發運使建議濬淮南漕渠廢

諸堰臻言揚州召伯堰實謝安為之人思其功以比召

伯不可廢也濬渠亦無所益召為三司度支判官而發

運司卒濬渠以通漕臻坐前異議降監察御史知睦州

宋史王臻傳

崔立字本之鄆陵人天禧中知江陰軍開橫河六十里

通運漕累遷太常寺少卿

宋史崔立傳

陳知微歷京東轉運副使決古廣濟河通運路罷夾黃河歲減夫役數萬計遷右司諫

宋史陳知微傳

劉湜為鹽鐵副使兼領河渠事汴水絕鑿河陰新渠通漕運如故

宋史劉湜傳

徐起徙江東轉運使請開長淮舊浦以便漕運

宋史徐起傳

張君平管勾汴口建言歲開汴口當擇其地則水湍駛而無留沙歲可省功有百餘萬又請沿河縣植榆柳為

令佐使臣課最及瘞汴河流屍悉從其言

宋史張君平傳

宋仁宗天聖二年春二月庚午遣內臣收瘞汴口流屍

仍祭奠之

宋史仁宗本紀

二月崇儀副使巡護惠民河田承說獻議重修許州合流鎮大河堰斗門剏開減水河通漕省

迂路五百里詔遣使按視以聞

宋史河渠志

宋仁宗天聖三年汴流淺特遣使疏河注口四年大漲隄危眾情恟恟詔度京城西賈陂岡地洩之于護龍河

宋史河渠志

宋仁宗天聖四年五月己酉復陝西永豐渠以通解鹽

宋史仁宗本紀 閏五月陝西轉運使王博文等言準敕相度開治

解州安邑縣至白家場永豐渠行舟運鹽經久不至勞

民按此渠自後魏正始二年都水校尉元清引平坑水

西入黃河以運鹽故號永豐渠周齊之間渠遂廢絕隋

大業中都水監姚暹決堰濬渠自陝郊西入解縣民賴

其利及唐末至五代亂離迄今湮沒水甚淺涸舟楫不

行詔三司相度以聞宋史河渠志是年汴水溢決陳留隄又決

京城西賈陂入護龍河以殺其勢宋史五行志王曾以門下侍

郎兼戶部尚書天聖四年夏大雨傳言汴口決水且大

至都人恐欲東奔帝問曾曾曰河決奏未至第民間妖

言爾不足慮也已而果然宋史王曾傳

宋仁宗天聖五年八月都大巡護惠民河王克基言先

準宣惠民京索河水淺小緣出源西京鄭許州界惠民

河下合橫溝白鴈溝京索河下合西河湖河雙河禦霸

河丈八溝各為民間截水蒔稻灌園宜令州縣巡察宋史

河渠志

宋仁宗天聖六年七月尚書駕部員外郎閻貽慶言五

丈河下接濟州之合蔡鎮通利梁山灤近者大河決蕩

溺民田壞道路合蔡而下漫散不通舟請治五丈河入

夾黃河因詔貽慶與水官李守忠規度計功料以聞

是年勾當汴口康德輿言行視陽武橋萬勝鎮宜存斗

門其梁固斗門三宜廢去祥符界北岸請為別竇分減

溢流而勾當汴口王中庸欲增置孫村之石限悉從其

請宋史河渠志高化遷蜀州團練使天聖六年夏大雨命護汴

隄夜馳至城西隄欲壞督守兵負土不能過時夏守恩

方典軍積材木城隅化盡取以塞隄乃得無患仁宗嘉

之進神龍衛四廂都指揮使宋史高化傳

宋仁宗天聖七年康德輿言修河芟地為並灘農戶所

侵詔限一月使自實檢括以還縣官 是年王克基言

按舊制蔡河斗門棧板須依時啓閉調停水勢

宋史河渠志

康

德興天聖中遷內殿崇班河陰兵馬都監建沿汴斗門以節水會積雨汴水將溢德興請自京西導水入護龍

河水得不溢

宋史康德興傳

張綸除江淮制置發運副使築漕河隄二百里於高郵北旁錮巨石爲十碶以洩橫流泰州有捍海堰延袤百五十里久廢不治歲患海濤冒民田綸方議修復論者難之以爲濤患息而蓄潦之患興矣綸曰濤之患十九而潦之患十一獲多而忘少豈不可耶表三請願身自臨役命兼權知泰州卒成堰復逋戶二千六百州民利

之爲立生祠居淮南六年累遷文思使昭州刺史綸有材畧所至興利除害爲人怨喜施予在江淮見漕卒凍餒道死者衆歎曰此有司之過非所以體上仁也推奉錢市襦千數衣不能自存者

宋史張綸傳

淮南漕渠築埭以蓄水不知始何時舊傳名伯埭謝公所爲按李翔來南錄唐時猶是流水不應謝公時已作此埭天聖中監真州排岸司右侍禁陶鑑始議爲復闡節水以省舟船過埭之勞是時工部郎中方仲荀文思使張綸爲發運副使表行之始爲真州闡歲省冗卒五百人雜費百二十五萬運舟舊法舟載米不過三百石闡成始爲四百石船其後所載浸多



官船至七百石私船受米八百餘囊囊二石自後北  
神名伯龍舟茱萸諸埭相次廢草至今為利予元豐  
中過真州江亭後糞壤中見一卧石乃胡武平為水  
閘記畧叙其事而不甚詳具

夢溪筆談

宋仁宗景祐元年閏六月甲子泗州淮汴溢

宋史五行志

宋仁宗慶曆元年三月汴流不通

宋史五行志

宋仁宗慶曆四年三月省廣濟河歲漕軍儲二十萬石

宋史仁宗本紀

宋仁宗皇祐元年二月甲戌河北黃御二河決並注于

乾寧軍河朔頻年水災

宋史五行志

宋仁宗皇祐三年

宋史仁宗本紀  
五行志作二年

是年命使詣中牟治堤明

年八月河涸舟不通令河渠司自口浚治歲以為常舊  
制水增七尺五寸則京師集楚兵八作排岸兵負土列  
河上以防河滿五日賜錢以勞之曰特支而或數張數  
防又不及五日而罷則軍士屢疲而賜予不及是歲七  
月始制防河兵日給錢薄其數才比特支十分之一軍  
士便之明年遣使行河相利害

宋史河渠志

楊佐遷河陰發運判官幹當河渠司皇祐中汴水殺溢  
不常漕舟不能屬佐度地鑿瀆以通河流於是置都水  
監命佐以鹽鐵判官同判京城地勢南下涉夏秋則苦  
霖潦佐開永濟河疏溝澮出野外自是水患息又議治  
孟陽河議者謂不便佐言國初歲轉京東粟數十萬今

所致亡幾倘不濬復舊跡後將廢矣乃從其策出為江  
淮發運使孟陽之役調民七八千夷止墓百數怨聲盈  
塞詔開封鞠治官吏獨舍佐不問糾察刑獄劉敞請加  
貶黜不聽召為鹽鐵副使

宋史楊佐傳

郭諮嘗謂作汴乘素河三十六陂之流危京師請自鞏  
西山七里店孤株嶺下鑿七十里導洛入汴可以四時  
行運詔都水監楊佐同往計度歸未及論功卒

宋史郭諮傳

陳襄知常州運渠橫過震澤積水不得北入江為常蘇  
二州病襄度渠之丈尺與民田步畝定其數授以浚法  
未幾遂削望亭古堰水不復積入為開封推官

宋史陳襄傳  
按襄以富

弼入相薦為秘閣校理知  
常州弼相在至和二年

王素知開封府至和二年秋大雨蔡河裂水入城詔軍  
吏障朱雀門素曰皇上不豫兵民廬舍多覆壓衆心怍  
怍然奈何更塞門以動衆遣詔止其役水亦不害

素傳

宋史王

卷第九十五



